

REV -

Apokalisə

Yìèn tə, Yu nə biri Zwan nə, v ma gúrí

“Apokalisə”

Apokalisə sagı tə yuu wa sugu

Lìù tə, v nə púpúní sagı ku tə

Lìà zənzən buŋa də, ku yi Zwezi karbiu Zwan nə púpúní ku. Mə v mù Zwan təntə tətə nə púpúní Zwezi-**Kərisə* suywájú tə. U yà kwın zənzən mánjá tə wa, v nə púpúní sagı ku tə. Ba yà jun wá, ba ja va ba dugv Patəməsə nə, ku nə yi muv tətəŋi nagwanaa.

Lìà tə nə, v nə púpúní

Zwan púpúní sagı ku tə v pa **Kərisə* lìà púlə tə nə, lìà tə nə dó càn tə wa, ba nə ken ba waa Zwezi-*Kərisə* nə yırı. Ku mánjá tə wa, də **Romə*-ba yà kəni càn *Kərisə* lìà tə nə.

Sagı tə wa sugu

**Kərisə* lìà tə vənà wulə tə gwàrì. Ba ba *Kərisə* na də v biàn, sə v dó diàn lwanı yuu wa.

Zwan púpúní ba nə, sə v ma dân ba jìàn zənzən, ba nə ken ba waa Zwezi-*Kərisə* nə, ba ga ja yala də wá yırı. Zwan pìà, sə v twá nətı, v ma biri də lwanı yi, ndə tə diàn dwə won mama. Yá Zwezi-*Kərisə* yi luu mama pìú, v mù cıci ga nə yi **Yuu-Tiu*. U pàrì tə dwə tia yuu pègá tə pàrì tə. Ku wá twá də v mù Yu də lìà tə, ba nə yi Yu nə ti ma dó diàn míámíán dun

don nə. Sagı ku tə wa yìèn tə Yu nə biri, ku yi, sə tə san nəba, sə nə lwari yìèn tə mama, nə wá twá Kərisə tutuŋi tə də v ka bwin ka nan tian wa tə nə, tə ma bà. Tə wá bà síún nə, də mánjá tə ka nə biàn, tə pa lià tə mama nə, ba yi v nyiən tə.

1

Sagı tə yuu wa sugu

(Apokalisə 22.6-10)

¹ Sagı ku tə yi yìèn tə, Yu nə pın Zwezi-*Kərisə nə, sə v biri v tutunbia tə nə, sə ba ma lwari, ku tə nə me, sə ku bà síún síún. Zwezi tun v *malika, sə ku swìn tə yìèn təntə, ku biri à mù Zwan nə, à nə yi v tutunbiu. ² À mù Zwan swìn ku tə mama, à nə ni, à ga swìn Yu sugu tə, v nə pın Zwezi-Kərisə nə, sə v biri nə. ³ Pupwən liù nə yi liù tə, v nə kàri də ba tə, ba nə cuga sagı ku tə yìèn tə, ba ga sè tə sùràn tə nii. Tə yi Yu nii sùràn. Tə yìèn tə də mánjá ga bwələ.

Zwan jùnì Kərisə lià púlə barpe tə nə wulə Azi nə

(Apokalisə 5.8-13, Matia 24.30-31)

⁴ À mù Zwan nə púpúní à pın á mù, *Kərisə lià púlə barpe tə nə, tə nə wulə Azi nagwanaa wa.

Yu nə wá fwa pubwanu á yira, v ga pa aba bican sié. U mù nə yi liù tə, v nə yin lá fuən fuən, v nə wulə, v ga tə biàn. U *Siŋən barpe*f1*, tə nə wulə v padav tə yáá con, nə wá fwa pubwanu á yira, ku ga pa aba bican sié də.

⁵ Zwezi-Kərisə də wá fwa pubwanu á yira, v ga pa aba bican sié. U mù nə yi liù tə, v nə swìn Yu cígá tə v biri də pùé nədu. U mù nə yi təntən liù, v nə nan, v mù ga nə dí yáá v bwin v nan tian wa. U mù dân nə yi tia yuu pègá me yuu tíú. Zwezi-Kərisə swə nəba, yá v tuga, v jana ga nan, v ma jon

nəba nə cuna wa. ⁶ U dân tə pɪn, nə twá nə yɪ Yu pàrì tə lià. U tə pɪn nə jì Yu *joŋwana, sə nə tɪn nə pa v nyɪna Yu nə. Dun də diàn mɛ, sə tə ya v mù Zwezi-Kərisə nyiən, mánǎ də mánǎ, ku nə ba zwè. Amuna!

⁷ Á cuga zəni, v nan bakwan tə wa, v ma biàn. Ləzwənə mama wá na wá də ba tə tətə ba nə zuə wá ba pórí*f1*. Yá dwíǎ tə mama tia yuu wá kwi yinəgə kurə v yɪrɪ. Ku yɪ cígá nə! Amuna!

⁸ *Yuu-Tiu Yu nə swìn, v wú: «À yɪ Aləfa də Omega, ku mù nə yɪ təntən də talíkwa liù. À mù nə yɪ liù tə, v nə yɪn lá fuən fuən, v nə wulə, v ga biàn. À mù nə wulə tə mɛ yuu wa.»

Zwezi-Kərisə pɪn, Zwan na wá v dun tə wa

⁹ À mù Zwan yɪ á nubiú *Kərisə yɪrɪ, à də ga dó càn zənzən də aba. À mù də aba yɪ Yu pàrì tə lià. Á mù də à mù twá də Zwezi, nə na pínú wuuu, nə dànà ká pìi nə kə nə kwa. À mù yɪ ba jɪn nə, ba ja va, ba dugu Patəmɔsə nə muv tətəŋi wa, à nə swìn Yu sugu tə, Zwezi-Kərisə nə bɪrɪ nə tə yɪrɪ.

¹⁰ *Yuu-Tiu dun*f1* tə nə, Yu-*Siŋu tə twi, ku sú nə, à ga nì kori don à kwa, ku nə swìn də diàn, ndə nabwana kori nə, ¹¹ ku swìn, ku wú: «Ku tə, n nə na, púpúní ku, n kə sagɪ wa, n ga tɪn ku, n pa, ku va Kərisə lià púlǎ barpe tə wa. Kərisə lià púlǎ barpe təntə wulə: Efezə, də Səmirənə, də Pəragamə, də Tiatiɾə, də Sarədə, də Filadeləfi, də Lawodise tɪn tə wa.»

¹² À pìi à vəvəri, sə à lwarɪ liù tə, v nə swìn à con. À nə vəvəri à zwè, à nɪ síán canzilan barpe tə zɪga. ¹³ Yá won dân zɪga tə canzilan təntə tətəŋi wa, ku nə yɪn ndə ləzwənə nə. U yà zua ganzwɪdaru, ku cú ku ja v napɪra nə, v ga vwə síán voru v nyɪnɪ nə. ¹⁴ U yukɪran yà yɪ nəpon ndə gumuən nə, parɪ tətətə. U yíá yà yɪ ndə mənvoó nə. ¹⁵ U nəe yà yɪ ndə cɪnɪan lugu nə, ku nə sìàn, ku nan mən wa. Yá v kori də yà yɪ ndə níá nə dáá, tə ga curi nə. ¹⁶ U yà jə kacɪlace barpe v jɪzən jɪn tə wa. Kwatara sìú, ku nə jə níǎ bələ fɪla fɪla, yà naŋa v nii wa. U yáá yà yɪ ndə yu nə bɪga, yɪcav ga

twəŋə yíá wa nətu.

¹⁷ À nə nɪ wá, à tua v nəe nə ndə à tɪga. U ma tún v jɪzən juɪn tə à yuu wa, v ga swìn, v wú: «Dàn ká pa fən ja mú! À mù nə yɪ tɛntɛn də talíkwa liù, ¹⁸ à yɪ liù tə, v nə wulə mu wa. Á cuga zəni, à yà tɪga, yá à dàń pìí à bwin, à wulə mu wa, mánjá də mánjá, ku nə ba zwè. À jə tɪan də tɪga bwálí mimii me borbua à jiàn wa.» ¹⁹ N dàń púpúní yìèn tə, n nə nɪ n tún. Ku mù nə yɪ ku tə, ku nə wulə ku tuŋa síún nə, də ku tə nə wá bà, ku tun me, n tún. ²⁰ À wá bɪrɪ mú yosəgu tə, ku nə wulə kacɪlace barpe tə, n nə nɪ də, à jə à jɪzən juɪn wa də síán canzɪlan barpe tə yuu wa. Kacɪlace barpe tə bɪrɪ *malíkɛ*f1*, tə nə pìà tə bɪrɪ Kərisə lià púló barpe malíkɛ tə. Yá canzɪlan barpe tə də yɪ Kərisə lià púló barpe tə nə ku bɪrɪ.

2

Sagɪ tə, ku nə me, sə ku pa Efezə Kərisə lià púlí tə nə

(Tutunən 20.17, 28-31, Efezə tiàn 1.15-16, 5.2, Ebərə-ba 6.10-12)

¹ Liù tə kúbə swìn à con, v wú: «Púpúní, n pa *malíkɛ tə nə, ka nə pìà ka bɪrɪ Efezə *Kərisə lià púlí tə.

Púpúní də, sugv ku tə yɪ liù tə, v nə jə kacɪlace barpe tə v jɪzən juɪn wa, v ga vəli síán canzɪlan barpe tə tətəŋi wa, nə swìn ku:

² À yèé á tutunɛə nə yɪ nətu. À ma yèé á kajaŋa nə yɪ nətu. À tə ga yèé, á nə jə pínú wuuu, ku pa á wà pìí á kə á kwa nətu. À yèé də á wàri wulɔnyɪna á píní. Á dódón lià tə, ba nə wú, ba yɪ Zwezi-Kərisə *tuntuna, yá ba ga tà ku, á na də, ba yɪ kunkuna. ³ Á juɪn pínú wuuu, ku pa á wà pìí, á kə á kwa. Á dí càn à yɪrɪ, yá á juɪn ga wà gwàri. ⁴ Yá ku tə, à dàń nə caga á nii nə ku yɪrɪ síún nə, ku mù nə yɪ á nə kúbə ba nə swə ndə ku nə yɪn nətu ku jɪju nə. ⁵ Á pirə á líí á tiàn də, á yà fwa zəni jɪju mama, yá á pìí á kə á kwa. Á dàń vəvərə á kwa, á ma sá á

cuna tə, sə á ga fwa ku tə, á yà nə fwa ku juv mama. Á nə wà lwàń, à wá bà á con, à lɪ á cànú tə ku bwálí tə wa. ⁶ Yá yozəŋu tə, á nə wulə ku wa, nə yɪ, á nə culi Nikolayitə-ba tutunɛ tə, ndə à də nə culi tə nətu.

⁷ Lìu mama dàń mɛ, sə v kə diàn, v súrí v zian, sə v ma cugu ku tə, Yu-*Siŋu tə nə swìn Kərisə lià púlí tə con. Lìu tə nə, v nə wá dé diàn lwanɪ yuu wa, v zu Yu sàń tə wa, à wá pa v dé tiú bia tə, tə nə pɪn mu.»

Sagi tə, ku nə mɛ sə ku pa Səmirənə Kərisə lià púlí tə nə

(Matə 5.10-12, Zwakə 1.12)

⁸ Lìu tə kúbə swìn à con, v wú: «Púpóní, n pa *malɪka tə nə, ka nə pià ka bɪrɪ Səmirənə Kərisə lià púlí tə yuu.

Púpóní də, sugu ku tə yɪ liù tə, v nə yɪ təntən də talɪkwa liù nə swìn ku. U mù nə yɪ liù tə, v nə tɪga, yá v dàń pɪɪ v bwin, v wulə mu wa.»

⁹ U swìn, v wú:

«À yèé á càn zənzən tə də á zurɪ tə yoo. Yá á ga yɪ lià tə, á nə yɪ juə tián Yu yáá con. À yèé lià tə nə swìn də ba yɪ *Zwifə-ba dwíí, yá ba ga tà Zwifə-ba tə, tɪjaŋa tə yoo. Ba mù lià təntə yɪ *Sitana kwa lià.

¹⁰ Á wá na càn, yá á nə dànà ká pa fən ja aba. Á cuga zəni, Sitana wá pa, ba kə á wa lià duən bàń diè wa, sə á dé càn, sə v ma na ku tə, á nə yɪ. Á wá na dian fugə wuwalu. Á dàń yana pùé nədu tián, ku ja vɛli á tian, á wá na mu tə, ku nə ba zwè.

¹¹ Lìu mama dàń mɛ, sə v kə diàn, v súrí v zian, sə v ma cugu ku tə, Yu-Siŋu tə nə swìn Kərisə lià púlí tə con.

Lìu tə nə, v nə wá dé diàn lwanɪ yuu wa, nɛɛ bələ nii tian tə bá yɪ wá.»

Sagi tə, ku nə mɛ, sə ku pa Pəragamə Kərisə lià púlí tə nə

(Zwidə 3-4, 11)

¹² Liù tə kùb swìn à con, v wú: «Púpúní, n pa *malıka tə nə, ka nə pìà ka bırı Perəgamə Kərisə lià púlí tə yuu.

Púpúní də, sugv ku tə yi liù tə, v nə ja kwatara sùú, ku nə ja níé bələ fula fula, nə swìn ku, v wú:

¹³ “À yèé də tiv tə, á nə wulə ku wa, yi *Sitana patıv. Bəe don yà wulə, ba nə boŋə Antipasə. U yi liù tə, v nə swìn à yoo v bırı də pùé nədu. Ba jun wá, ba gu á tətəŋi wa Sitana patıv təntə wa. Mánjá tə ku nə tun, ku tə wà pa, á pìí á kə á kwa. Á tə vwə á tìàn à nə zəni zəni, ku mánjá təntə wa. ¹⁴ Yá də ku me, ku tə à dān nə caga á nii nə, ku yırı síún nə, ku mù nə yi á lià tə, ba nə wulə Balamə kàrà cwəŋə tə wa. Balamə yà kwè Balakə fuən fuən, sə v pa *Yızərayelə lià tə dó woŋwanan nənjá, sə v pa, ba pəń duən vee vee, sə ku kə ba cuna wa.

¹⁵ Lià duən də tə wulə á con, ba də nə wulə Nikolayitə kàrà cwəŋə tə wa, ku nə yi ndə tə yìèn təntə nə. ¹⁶ Á dān vəvərə á kwa, á ma sá á cuna tə. Ku nə tà ku mù, à wá bà á con lala, à ga wá ta lià təntə də kwatara sùú tə, nə naŋa à nii wa.

¹⁷ Liù mama dān me, sə v kə diàn, v sùrí v zian, v ma cugv yoo tə, Yu-Sıŋu tə nə swìn Kərisə lià púlí tə con nə. Liù tə, v nə wá dó diàn lwanı yuu wa, à wá pa wá wodiı tə, ku nə sègè, ba nə boŋə “manə.” À wá pa wá kapan nəpon, yırı nəduv nə púpúní ku yuu wa. Liù mama yəri ku yırı tə də ku nə tà liù tə cıci nə, ba nə pın ku.” »

Sagı tə, ku nə me, sə ku pa Tıatirə Kərisə lià púlí tə nə

(1 Tesalonikə tiàn 1.2-3, Tòtònán 15.28-29, 1 Korentə tiàn 10.8, 19-22)

¹⁸ Liù tə kùb swìn à con, v wú: «Púpúní, n pa *malıka tə nə, ka nə pìà ka bırı Tıatirə *Kərisə lià púlí tə. Nəń ku tə Yu-Bıu tə v yía nə yi ndə mənvoov nə, v nee ga yi ndə cınıan lugu nə, nə swìn:

¹⁹ “À yèé á tutunee nē yi nētu. À yèé də, á swə duən, yá á ga tē kēni á waa à nē. À yèé, á nē saŋa lià duən nē nētu. À yèé, á nē jē pínú wuuu, ku nē pín, á ba píí á kēni á kwa nētu. À ga yèé də síún nē, á tūtúnán tē dáá, tē doni á tēntēn nyiēn tē. ²⁰ Yá à tē jē yoo, à nē wá caga á nii nē ku yiri síún nē. Ku yi kan tē, ba nē boŋə Zwezabelə, v nē kuni á con də, v yi Yu nii susunkana tē yuu wa. Á yàá yá wá, á pa v kàrì à tutunbia tē, v ma gıgarı ba, v pín, ba pèní duən vee vee də v pín, ba dé woŋwanan nàŋá. ²¹ À pín máná ku mù kan tēntē nē, sē v vəvəri v kwa, v ma sá v cuna tē. Yá v vıga ku nētu tē, v ga pià, sē v tē pēni də lià vee vee, v ja ya lá. ²² Á cuga zēni, ku mù nē pín, à wá pa v tu yayıgv, v pēnı tia, v dé càn zēnzēn. À wá kē ba tē də, ba nē tuŋa bacwan tē, də wá càn zēnzēn wa, də ba nē wà ba tiàn lı yokukwınan tē wa, ba ga vı v tutunee tē. ²³ À wá gv v lià tē də mama, ba nē wulə v tutunee tē wa. *Kərisə lià púló tē mama dānı wá lwarı də, à mù yi liù tē, à nē yèé ləzoni pubuŋı, də ku tē nē wulə ba waa con. Yá à ga wá ŋwın ku tē nē me də á liù mama tutuŋı, à pa wá. ²⁴ Yá á mù lià tē duən tē, á nē wulə Tıatirə Kərisə lià púlí tē wa, á nē wà kàrà kukwıwn tēntē nē twá, á mù wà pià, sē á yēni ku tē ba nē boŋə *Sitana yosəgēn tē dēnı. À dānı swın á con də à ba yoo don jē, à swın á con, sē á tun. ²⁵ Á dānı nē jana ku tē, á nē jē ku yıra zēni, ku ja vələ máná tē, à nē wá bà.

²⁶ Liù tē, v nē wá dé diàn lwanı yuu wa, v nē wá tun à tūtúnán tē, ku ja va ku yí luv zaŋv də v wá yá, à wá pa, v dé diàn luv dwíé tē mama yuu wa. ²⁷ U wá dé pàrì ba yuu wa də diàn. U wá cùgù ba, ndə ba nē lwe tiran nəkēni nētu. Mə nētu nē, à nyına Yu pín diàn tēntē à tētē nē. ²⁸ Yá à wá pa jıgv fuən fuən kacılacv tē, nē yàá pēn tē, ku tíú nē.

²⁹ Liù mama dānı me, sē v kē diàn, v súrı v zıan, v ma cugv ku tē,

Yu-*Siṇu tə nə swìn Kərisə lià púlí tə con.” »

3

Sagi tə, ku nə me, sə ku pa Sarədə Kərisə lià púlí tə nə

(Zwakə 2.14, Matia 7.21-23, 24.42-51)

¹ Liù tə kúbə swìn à con, v wú: «Púpóní, n pa *malika tə nə, ka nə pià ka buri Sarədə *Kərisə lià púlí tə yuu.

Púpóní də, sugv ku tə yi liù tə, v nə jə *Siṇən*f1* barpe tə də kaculace barpe tə v juun wa, nə swìn ku v wú:

“À yèé, á tutunee nə yi nətə. Á yiri nan ku pa lià buṇa də, á yi lià tə, á nə wulə mu wa. Yá á ga yi lià tə, á nə yi ndə tɪga nə, Yu yáá con. ² Á zàṇá dwiən nə, á ga dàn lià tə gɪganɪ tə duən jìàn, ba də nə yà wulə ba tɪ, à nə nɪ á tutunee tə, tə nə wà me à nyina Yu yáá con yiri. ³ Á pìí á lǐí á tiàn nətə tə, á nə nì Yu sugv tə, á ga cugu ku. Á jana ku á bican wa, sə á ga vəvəri á kwa, á ma sá á cuna tə. Á nə wà dwiən nə zàn, à wá bà, à dì á yuu ndə ŋwìàn nə. Á bá yəni máṇá tə, à nə wá bà. ⁴ Yá á lià duən tə wulə Sarədə wa, ba nə wà sè, ba zu durən wa. À wá pa ganpwənə lià təntə nə ba zu, ba ga wá va də nə ba nə me də ku nətə tə yiri.

⁵ Mə lià tə mama, ba nə wá dé diàn tə lwanɪ yuu wa tə, wá zu ganpwənə nətə. À bá pupugu ba yira tə Yu sàń mu sagi tə wa. Yá à dàn wá swìn ba yoo də ba yi à mù lià, à nyina Yu də v malike tə yáá con.

⁶ Liù mama dàn me, sə v kə diàn, v sùrí v zian, v ma cugu ku tə, Yu-Siṇu tə nə swìn Kərisə lià púlí tə con.” »

Sagi tə, ku nə me, sə ku pa Filadələfi Kərisə lià púlí tə nə

(2 Piyeṛə 2.9, 1.10-11)

⁷ Liù tə kúbə swìn à con, v wú: «Púpóní, n pa *maluka tə nə, ka nə pià ka buri Filadeləfi *Kərisə lià púlí tə yuu.

Púpóní də, sugv ku tə yi liù tə, v nə ba man don jə, v ga yi cígá tíú tə nə swìn ku.

U mù nə yi liù tə, v nə jə piú *Davidə mimii borbta tə. U nə súde, liù tələ, v nə wàá v sunə. U nə kúbə sun, liù tələ, v nə wàá v súde.»

⁸ Liù tə kúbə swìn à con, v wú:

«À yèə á tutunəe nə yi nətu. Á cuga zəni, à súde cwəŋə à pa aba, liù ga tələ, v nə wàá ku nə v cì. À yèə də á diàn ba dáá, yá á ga twá à sùràn tə nii nə, á wà swìn də, á yəri nə. ⁹ Á nəŋə nətu tə, à nə wá fwa *Sitana kwa lià tə, ba nə wú, ba yi *Zwifə-ba dwíí yá ku ga yi kunkun ba kun. Á cuga zəni, à wá kálú ba lià təntə, à pa ba bà, ba tu ba nadwana yuu á yáá con, sə ba ma lwarı də à swə aba. ¹⁰ Á mù sè à sugv zəni zəni, á jin pínú wuuu, á ga wà pìí á kə á kwa. Ku mù yırı nə, à də wá cì á nə, máná tə wa, yìèn nə wá bà, tə wuwalı aba tia ka tə yuu wa. Cígá, yìèn wá bà tia yuu ləzoni tə mama yuu wa, sə tə pa ba lwarı ku tə, liù mama nə yi. ¹¹ À wá bà lala. Á jana ku tə, á nə jə ku nə, zəni zəni, sə liù mama dān ká wàní, v jon á zìlə won tə, Yu nə wá pa aba.

¹² À wá pa liù tə, v nə wá dí diàn lwanı yuu wa, jì ndə diè tətəŋi baŋa nə à nyina Yu diè tə wa, yá v kúbə bá nan abada. À wá púpóní à nyina Yu yırı tə də v tiv nəfarv tə yırı, à tún v yuu wa. Ku tiv tə nə yi *Zwerizalemə nədun tə, Yu nə wá pa, ku nan v sàń nə, ku cú. À wá púpóní à yırı nədun tə də ku mù lià təntə yuu wa.

¹³ Liù mama dāń mə, sə v kə diàn, v súde v zian, sə v ma cugu ku tə, Yu-*Siŋu tə nə swìn Kərisə lià púlə tə con nə.»

Sagi tə, ku nə mə, sə ku pa Lawodise Kərisə lià púlí tə nə

(Likə 14.34-35)

¹⁴ Liù tə kùb swìn à con, v wú: «Púpóní, n pa *malika tə nə, ka nə pià ka biri Lawodise *Kərisə lià púlí tə yuu.

Liù tə, v yiri nə yi “Amuna”, tə nə swìn. U mù nə yi liù tə, v nə swìn à yoo v biri də pùé nədu, v ga yi cígá tíú. Wiən tə də mama, Yu nə fwa, yi tə nan v mù con.

¹⁵ U swìn, v wú:

“À yèé á tutunee nə yi nətə. À yèé də, á ba lɪɲa, Yu cwəŋə tə wa, á ma ba zurə də. Á yà me, á nə tà ku tə, sə á ya ku don. ¹⁶ Yá á dàń nə yi ndə níá nə yi pwala pwala, á ba lɪɲa, á ma ba zurə tə yiri, à wá tuni aba à lɪ à nii wa. ¹⁷ Á swìn də á yi jɪjə tián tə, á nə jə wiən tə mama, tə nə me də aba, á pa á tián nə, á ga kùb bá won mama pià. Yá á dàń ga yəri də, Yu yáá con, á yi basarɔnyina, á yi yinəgənyina, á yi zura, á yi ndə lilirən nə, á ga yi ndə wala nə, á ba gànù jə. ¹⁸ Ku mù yiri, à dàń kwè aba, sə á yè à con síán tə, tə nə twá mən wa, tə pɪrɔ tə nan, sə á ma jì cígá cígá jɪjə tián. Á yè ganpwənə də à con, á ma pú á yira tə nə, sə cavira kùb dàn ká ja aba, á nə yi wala tə yiri. Á yè yíá tania də à con, á kə á yíá tə wa, sə á wàní á na lá zəni. ¹⁹ Lià tə mama, à mù nə swə, mə ba mù nə à yàá caga ba nii nə, à ga firi ba. Á vəvərə á kwa, á ma sá á cuna tə, á ga ja yawala. ²⁰ Á nəŋə, à zɪga mimii nə, à ga mà ku nə. Liù tə, v nə nì à kori, v ga sùrí mimii tə, à wá zu ku tíú con, à dó də wá, yá ku tíú də wá dó də nə.

²¹ À wá pa liù tə, v nə wá dó diàn lwanɪ yuu wa, jèn à yira, à padau tə yuu, ndə à də nə dí diàn lwanɪ yuu wa, yá à ga jèé à nyina Yu yira, v padau tə yuu nətə tə.

²² Liù mama dàń me, sə v kə diàn, v sùrí v zian, v ma cugu ku tə, Yu-*Siŋu tə nə swìn Kərisə lià púlé tə con nə.” »

Yu padav tē dē nēkwina sapua dē bania tē yoo

¹ Ku kwa nē, à mē Zwan kùb ywàń. Nēń à nī mimii, ku nē sūrī Yu sàń nē. À kùb nī tēntēn kori tē, ku nē dí yáá, ku swìn à con, ku ga yī, ndē nabwana kori nē tē. Ku swìn à con, ku wú: «Dì yēbē, sē à bīrī mū yoo tē, ku nē biàn, sē ku tūn ku kwa nē.»

² Yu-**Siŋu* tē zēzēn ku bà, ku sú nē. Nēń à dāń nī padav, ku tégó Yu sàń tē wa. Yá liù yà jèé ku padav tēntē yuu. ³ Liù tē, v yà nē jèé ku yuu, yà pīpīlī, ndē kapan yiri don dē nē, ku nē tūŋè mēn, ba nē ma boŋē “zwasēpē”, v ga tē pīpīlī ndē kapan yiri don dē nē, ba nē boŋē “sarēdvanē.” Padav tē yī ku kīkarī dē dwà sū, ku nē yī ndē kapan don nē, ku dē nē tūŋè mēn, ba nē ma boŋē “emerodē.” ⁴ Padēē sapua dē bania kīkarī ku mē padav tēntē. Yá **nēkwina* sapua dē bania dāń jèé tē yuu wa. Ba zua gānān nēpwēnē. Ba ga pū síán dun yupurēn ba yun nē.

⁵ Yá dwà baa, ka pīpīlī, kwērē duēn dē dāń yà naŋa padav tē con. Yá mēnvoo barpe tē nē suru, yà wulē tē pīpīlī padav tē yáá con. Mē tē mēnvoo tēntē, nē yī Yu-Siŋu tē dē ku diàn dēkurēn barpe tē.

⁶ Padav tē yáá con, ku yī ndē mūnaa nē tégó lá nē, ku nē ga tūŋē mēn ndē zēŋē nē. Wiēn bania yà kīkarī padav tē, tē kē tētēŋi wa. Tē wiēn tēntē yáá dē tē kwa mama yà yī yíá cīcī. ⁷ Tēntēn won tē yī ndē gēru nē. Bēlē nii won tē yī ndē nabīē nē. Batwa nii won tē yáá yī ndē lēzwēnē yáá nē. Bania nii won tē yī ndē zunpuu nē, ku nē pēri yu nē. ⁸ Tē wiēn bania tē, nēdu mama jē vānā bardu, tē nē wāá tē pēri. Yá tē ga jē yíá, tē nē kīkarī tē mama, yíá duēn ga tē wulē vānā tē dēń dē. Titun dē yīcav, tē wiēn bania tē mē yī tē swìn mánjá mama, tē wú: «Yu dwē won mama! Yu dwē won mama! Yu dwē won mama! **Yuu-Tiu Yu* nē jē diàn tē mama yuu wa. U mē nē yun lá fuēn fuēn, v nē wulē, v tē ga wá biàn.»

⁹ Mə nətv nə wiən təntə dān pin dun, liù tə nə, v nə jèé padau tə yuu wa də tə zìlí v nii də tə kəni v lèè. U mù nə yì liù tə, v nə wulə mu wa, mánjá də mánjá, ku nə ba zwè. ¹⁰ Mánjá mama, wiən tə nə fwa nətv, nəkwina sapva də bania tə də yàá tu ba nadwana yuu liù tə yáá con, v nə jèé padau tə yuu wa, ba ga pin wá dun. U mù nə yì liù tə, v nə wulə mu wa, mánjá də mánjá, ku nə ba zwè. Ba dān yàá lɪ ba dun yupurən, ba tún padau tə yáá nə, ba ga swìn, ba wú:

¹¹ «Nə *Yuu-Tiu Yu, n yì liù tə, n nə mɛ, sə nə pa mú dun, sə nə zìlí mú. Diàn tə mama wulə n con, n nə fwa wiən tə mama yiri. Yá ku yì ku twá n tətə fira nə, n ma fwa tə, n pa tə wulə.»

5

Zwezi-Kərisə wàá sagi tə nii v lwàrì

(Romə tián 11.33-34, Filipə tián 2.5-11, Apokalisə 1.5-6, 7.9-12)

¹ Ku kwa nə, à nɪ liù tə, v nə jèé padau tə yuu wa, də v jə sagi v jizən jun wa. Sagi tə yáá bələ tə mama yà púpúní, ba ga pípírí ku, ba kə duən nə. Ku nii yà marɪ bwálá barpe də mɔɔ tanpɔnan barpe. ² Yá à dān nɪ *malɪka, ka nə jə diàn də ka baa, ka kəni yu nə, ka swìn, ka wú: «Wàà nə wulə, v nə mɛ, sə v lwàrì ku mɔɔ tanpɔnan barpe tə, sə v sùrí sagi ku tə?» ³ Yá liù mama dān təlɔ́, v nə nan Yu sàń, nə à yèé tia yuu, nə à yèé tɪga bwálí nə, ku tíú nə mɛ, sə v sùrí sagi tə, v ywàń ku wa. ⁴ Yá à dān kwi zənzən, liù nə təlɔ́, v nə mɛ, sə v sùrí ku, v ywàń ku wa tə yiri. ⁵ *Nəkwia tə don dān ma swìn à con, v wú: «Dān ká kwi! Nèń piú *Davidə nàú tə, *Zwida dwíí dəkuu tə wa, yì ndə gəru nə, v nə dí diàn, won mama yuu wa. U wá lwàrì sagi tə turan mɔɔ tə də ku tanpɔnan barpe tə, v ga sùrí ku.»

⁶ Ku kwa nə, à nɪ liù də v zɪga padau tə, də wiən*fl* bania tə də nəkwina sapva də bania tə tətəŋi wa. Ka yà yì *pabiə nə, ba nə ken sùú ka bian nə.

Ka yà jə nyɔran barpe də yíá barpe. Yíá barpe tə nə yɪ *Sɪŋən*f1* də barpe tə, Yu nə tun tia tə mama yuu wa. ⁷ U mù liù tɛntə twi, ɔ jon sagɪ tə, ku nə wulə liù tə, ɔ nə jèé padau tə yuu, jɪzan juun wa. ⁸ Mánǎ tə wa, ɔ nə jon ku sagɪ tɛntə, wiən bania tə, də nəkwina sapua də bania tə tua ba nadwana yuu, ɔ yáá con. Ba liù mama yà jə bànú də sían wùrú zwun tə nə súé də tɪralɪ, sə ba suru tə. Tə mù nə bɪrɪ lià tə, ba nə yɪ Yu nə tɪ, yɪjuɪ tə. ⁹ Ba dàń wulə ba nuŋə nundun, ba wú:

«N yɪ liù tə, n nə mɛ, sə n tɪ sagɪ tə, n lwàrɪ ku turan mɔɔ tə də ku tanpɔnan barpe tə, n nə yɪ ba ken sùú n bian nə, sə ku twá n jana tə nə, n ma yè lià n jon, n pa Yu nə tə yɪrɪ. N yè dwíé dəkuren yiri mama lià, də nɛndəli yiri mama lià, də luu nii mama lià, də luu dwíé tə mama wa n jon ba cuna wa, n pa Yu nə. ¹⁰ N tə pɪn ba jì n pàrɪ tə wa lià. N tə pɪn ba jì Yu *joŋwana, sə ba tun, ba pa nə Yu tə nə, yá ba ga wá dɔ pàrɪ tia yuu wa.»

¹¹ À kùú ywàń, à ga na malike nə dáá zənzən, à ga nì tə kwərə. Tə yà yɪ tə kɪkarɪ padau tə, də wiən bania tə, də nəkwina sapua də bania tə. Tə yà yɪ miliyun də miliyun də mùrù də mùrù. ¹² Tə baa tə kə yu nə, tə swìn, tə wú:

«Pabiə, ba nə ken sùú ka bian nə, tə mɛ, sə ka na pàrɪ, də juje, də wubuŋa, də diàn, də zìló, də dun, də bura.»

¹³ Yá à dàń nì də wiən tə mama, Yu nə fwa, tə nə wulə Yu sàń, də tia yuu, də tɪga bwálí nə, də muu wa swìn, tə wú:

«Bura, də zìló, də dun, də pàrɪ wulə, mánǎ də mánǎ, ku nə ba zwè, tə pa liù tə, ɔ nə jèé padau tə yuu də liù tə, ɔ nə yɪ ndə pabiə tə nə.»

¹⁴ Yá wiən bania tə dàń swìn, tə wú: «Amuna!»

Yá nəkwina tə də dàń tua ba nadwana yuu, ba də wulə ba pɪn ba dun Yu nə.

Təntən mɔɔ tanpɔnan tə, ka lwàrì yoo

(Matia 24.6-8, Likə 18.7-8, Apokalisə 7.13-14)

¹ À ywàń, à na liù tə, v nə yi ndə *pabiə nə də v lwàrì sagi tə təntən mɔɔ tanpɔn tə. Ku mánǵa tə wa, à nì də wiən bania tə wa won don swìn də kori, ku nə dáá, ndə dwà nə baa nə, ku wú: «Bàá yəbə!» ² À kúù ywàń, də nən sisan nəpon. Liù tə, v nə dìgà ka yuu, yà jə tvan. Ba pɪn wá dun yupuu, yá v dàń nan də bari, sə v ta v dé.

³ Ku kwa nə, liù tə, v nə yi ndə pabiə nə tə, kúù lwàrì bələ nii mɔɔ tanpɔn tə. Yá à kúù nì də wiən bania tə wa bələ nii nyiən tə də kúù swìn, ku wú: «Bàá yəbə!» ⁴ Yá sisan don, ku nə yi nəsiən, ndə mən nə, twi ku nan. Liù tə, v nə dìgà ku yuu tə, nì cwəŋə, sə v pa sié dān ká ya tia yuu wa, sə ləzoni kə siān duən bian nə. Yá ba dān pɪn wá kwatara siú nəfarv.

⁵ Ku kwa nə, liù tə, v nə yi ndə pabiə nə tə, kúù lwàrì batwa nii mɔɔ tanpɔn tə. À kúù nì də wiən bania tə wa batwa nii nyiən tə də kúù swìn, ku wú: «Bàá yəbə!» À ywàń də nən, sisan nəzonu ka twi ka nan. Liù tə, v nə dìgà ku yuu, yà jə səkəri v juun wa. ⁶ Yá à nì sugu ndə kori nə, ku nə nan wiən bania tə tətəŋi wa, ku wú: «Muna zuŋa yi cɪniən səbikulu*f1* nədu. Yá muna yiri don zwuun batwa yi səbikulu nədu. Dān ká sūrì nuga tə də swana tə mù səbiu!»

⁷ Ku kwa nə, liù tə, v nə yi ndə pabiə nə tə, kúù lwàrì bania nii mɔɔ tanpɔn tə. À kúù nì də wiən bania tə talikwa nyiən tə, swìn, ku wú: «Bàá yəbə!» ⁸ À ywàń də nən sisan, ku nə yi ndə pup?? nə. Liù tə, v nə dìgà ku yuu wa, yiri nə yi “tian.” Yá liù tə, ba nə boŋə “tiga bwálí” yà nə kwen wá. Ba yà nì diān, sə ba gu tia ka tə ləzoni pwìú bania vān nədu. Ba jə diān, sə ba pa ləzoni gu duən, də kwatara siú, də niən, də yayipwaran, də

tia ka tē yuu wojandirən gu lià.

⁹ Ku kwa nē, pabiē tētē kùbè lwàrì bonu nii mōō tanpon tē. À kùbè nì *jōŋi kúrí, yá lià jèrí dàń tégá ku sēpuni nē. Jèrí tēntē yi lià tē, ba nē ken siú ba bian nē, ba nē twá Yu sugu tē nē, ba ga swìn ku ba biri tē yiri. ¹⁰ Ba mà nii, ba kē yu nē, ba wú: «N yi nē *Yuu-Tiu Yu tē, v nē ba man don jē, v ga yi cígá tíú. Máná kúkaa wa nē, n wá b̀̀r̀i lià tē, ba nē gua nēba tia yuu wa bura, sē n kē ba càn wa, ku yiri?» ¹¹ Ba pìn ganpon ba liù mama nē, yá ba ga swìn ba con, ba wú: «Á tē dàná mancìn, á tē wà cé. Ku mē, sē ba tē gu á duən tē, ba nē yi á nubia *Kērisē yiri, dē ba tē ba nē yi á tutunduən tē, ba sùrí á nē.»

¹² Ku kwa nē, à kùbè ywàń, pabiē nē tē kùbè lwàrì bardu nii mōō tanpon tē. Tia tē vivaga zēnzēn. Yıcau tē jigē nēzonu ndē ganzonu nē. Cànà tē dē mama jigē nēstian ndē jana nē. ¹³ Yá kacılacē nan yu, tē twi tia, ndē voo nēfaru nē vuvugu kapıru, ku bia ga twi nētu. ¹⁴ Lanworu tē pēpēni ku tiàn, ndē ba nē pēpēni sara nētu. Yá pēen tē mama dē tia tē mama, ka nē wulē tētēŋi wa, dàń zàn tē yipeē nē. ¹⁵ Tia yuu pègá tē, dē lēzwēnfaran tē, dē pamana yun tiàn tē, dē jıjē tiàn tē, dē luv ladıra tē, dē ywēŋē tē mama, dē lià tē nē ti ba tiàn tē dēri, ba sègè pēen buran dē pìràn kwēlən wa. ¹⁶ Yá ba dàń swìn pēen tē dē pìràn tē con, ba wú: «Á twia nē yuu wa, sē á sègè nēba, sē nē ya yiŋunı, liù tē yáá nē, v nē jèé padau tē yuu. Á sègè nēba, sē pabiē tē, dàń ká cùgè nēba dē v lıŋa tē. ¹⁷ Ku yi cígá, ba lıŋa dun nēfaru tē twi, yá liù tēlé v dàń nē wá wàńı v jon v tiàn?»

7

Yu lià tē yoo

(Apokalisē 14.1-5, 21.3-4, Zwan 10.16, Romē tiàn 11.25-26, Apokalisē 21.3-4)

¹ Ku kwa nə, à nɪ *malike bania də tə zɪga yu nə, tia tə sapara bania tə wa. Tə cìgà voo tə nə naŋa sapara bania tə wa, sə ku dân ká fulu tia tə, də muu tə, də tiú mama yuu wa. ² Yá à tə kùbɛ nɪ malika don, ka nan yu yipian con, ka di yu də ka juun wa, won, ba nə fwa mumunan, ku nə yɪ Yu tə, ɔ nə wulə mu wa, nyiən. Ka zìn ka kori, ka kə yu nə, ka swìn malike bania tə con, ba nə pɪn tə diən, sə tə cùgù tia də muu tə, ka wú: ³ «Á tə dânà ká cùgù tia tə, də muu tə, də tián tə. Á yá, sə nə dí yáá nə fwa mumunan, nə Yu tutunbia tə tólé nə.» ⁴ Yá à dân nì də ba swìn lià tə nii, ba nə ken mumunan tə ba tólé nə. Ba yɪ lià mùrù bíi də mùrù sapwilə də mùrù bania (144 000), yá ba mama ga yɪ *Yızərayelə dwíé tə wa ləzwənbia.

⁵ *Zwida dwíí dəkuu tə wa, yɪ lià 12 000, ba mà tanpɔn tə ba tólé nə.

Ribən dwíí dəkuu tə wa, yɪ lià 12 000.

Gadə dwíí dəkuu tə wa, yɪ lià 12 000.

⁶ Azərə dwíí dəkuu tə wa, yɪ lià 12 000.

Nəfətali dwíí dəkuu tə wa, yɪ lià 12 000.

Manase dwíí dəkuu tə wa, yɪ lià 12 000.

⁷ Simeyon dwíí dəkuu tə wa, yɪ lià 12 000.

*Levi dwíí dəkuu tə wa, yɪ lià 12 000.

Yısakarə dwíí dəkuu tə wa, yɪ lià 12 000.

⁸ Zabulon dwíí dəkuu tə wa, yɪ lià 12 000.

Zwuzefə dwíí dəkuu tə wa, yɪ lià 12 000.

Benzwamen dwíí dəkuu tə wa, yɪ lià 12 000.

Ba lià təntə mama yɪ, ba mà tanpɔn ba tólé nə.

⁹ Ku kwa nə, à tə ywàŋá də nən lià kapupu, liù nə wàri ba nii ɔ gəlì. Ba yɪ luu dwíé tə mama wa, də dwíé yiri mama lià, də luu nii mama lià, də nəndəli yiri mama lià. Ba yà yɪ ba zɪga padau tə də liù tə, ɔ nə yɪ ndə *pabiə nə tə, yáá con. Ba yà zua ganpwənə, ba ga jə kùrì nəe ba jìàn wa.

¹⁰ Yá ba dân baa ba kə yu nə, ba swìn, ba wú:

«Ku yi Yu tə, v nə jèé padau tə yuu də pabiə tə, nə jon nəba nə cuna tə wa.»

¹¹ Yá malike tə mama dān ziga, tə kíkari padau tə, də *nəkwina tə, də wiən bania tə. Malike tə tua tə yáá yuu padau tə yáá con, tə wulə tə pín dun Yu nə, ¹² tə swìn, tə wú:

«Ku yi cígá! Nə *Yuu-Tiu Yu nə me, sə ba bu v nə, v me, sə v na bura, də zílá, də wubuŋa, də lèè kənu, də dun, də pàrì, də diàn. U mù nə me də tə yìèn təntə, mánjá də mánjá, ku nə ba zwè. Ku yi cígá.»

¹³ Nəkwia tə don dān ma swìn à con, v wú: «Llà tə, ba nə zua ganpwənə tə, nə yi labərə? Ba yi ba nan yèn?» ¹⁴ À mù Zwan ma le wá, à wú: «À Yuu-Tiu, n mù nə yèé ku swìn, nə biri nə!» U dān ma swìn à con, v wú: «Ku yi là tə, ba nə dí càn zənzən talíkwa mánjá tə wa. Ba sìn ba gànàn pabiə tə jana wa, tə ga pìrì.

¹⁵ Mə ku mù nə pín, ba wulə Yu padau tə yáá con, ba pín wá dun yícau də titín, v *dìè tə wa. Lìù tə, v nə jèé padau tə yuu, wá pú ba yuu nə. ¹⁶⁻¹⁷ Pabiə tə, v nə wulə padau tə tətəŋi wa, wá yìrì ba, v ga wá ja ba, v ja va nabuliyia tə bwálí nə, tə níá nə pín mi. Ku mù nə pín, niən kùb bá ja ba, nanyunì də bá ja ba. Yícau kùb bá mà ba nə, lɪŋì də bá yí ba. Yá Yu wá mùrí ba yinia tə mama.»

8

Mə tanpən barpe nii nyiən tə ka lwàrì yoo

(Apokalisə 5.8)

¹ *Pabiə nə tə kùb lwàrì mə tanpən barpe nii nyiən tə. Ku mánjá təntə wa, ku ken siii Yu sàń nə, ku ja va ndə lugu nədu də fan nə.

² Yá à dàń nì *malíke barpe, tə nə zɪga Yu yáá con, yá ba dàń ga pa tə nabwanan barpe.

³ Ku kwa nə, malíka don dàń twi, ka zɪga *joŋi kúrí tə yura. Yá síán kurpotu, ba nə ma sùrí tɪrali, ga wulə ka juun wa. Ba pɪn ka tɪrali zənzən, sə ka suru tə, ka pa Yu nə. Ka mù ga nə wá tì là tə də, ba nə yɪ Yu nə tɪ tə, yɪjuɪ tə də ka pa Yu nə, ku mù síán joŋi kúrí tə yuu, ku nə wulə padau tə yáá. ⁴ Tɪrali tə nywín də là tə, ba nə yɪ Yu nə tɪ yɪjuɪ, twá malíka tə juun nə, tə dɪ Yu yáá con. ⁵ Malíka tə tì tɪrali kurpotu tə, ka kə joŋi kúrí tə mən, ka sú ka nii, ka dɪlɪ tia yuu wa. Ku nətu tə pɪn, dwà baa, ka pɪpɪlɪ, kwərə duən də yɪn lá, tia tə də ga vɪvaga.

Təntən nabwanan bania tə wúrí yoo

⁶ *Malíke barpe tə, tə nə jə nabwanan barpe tə, dàń ken tə sírí, sə tə wúrí tə. ⁷ Təntən malíka tə wúrí ka nabwana tə. Dwà kafina də mən tə nə gùlí də jana nan, tə lwá tia yuu. Yá tia tə pwìú batwa vən nədu tə don, də tián tə, də pwìú batwa vən nədu, də galu tə mama dí mən.

⁸ Malíka bələ nii nyiən tə də wúrí nabwana tə. Ba dɪlɪ won don munaa tə wa, ku nə yɪ ndə paan nəfaru nə, ku mama nə kwé mən. Muu tə pwìú batwa vən nədu jigə jana. ⁹ Wiən tə, Yu nə fwa, nə wulə munaa wa, tə ga jə mu tə síí, pwìú batwa vən nədu tɪga. Níá yuu bwərə tə də pwìú batwa vən nədu cùgù.

¹⁰ Malíka batwa nii nyiən tə wúrí ka nabwana tə. Kacɪlacə nəfaru, ku nə kwen mənvo, ndə malɪ mən nə, nan lanworu tə wa, ku tu. Ku tua munɛə nəfaran tə pwìú batwa vən nədu də nabuliyia wa. ¹¹ Kacɪlacə təntə yɪrɪ nə yɪ “wocɪcau.” Níá tə pwìú batwa, vən nədu lwàń ku jì wocɪcau. Yá níá təntə dàń jigə nacɪcau. Ku mù nə pɪn, tə gu là zənzən, ba nə nyua tə.

¹² Malíka bania nii nyiən tə wúrí ka nabwana tə. Yɪcau tə pwìú batwa, vən nədu jigə yikunu. Ku yoo tə tun cànà tə yura, ku ga tun kacɪlacə tə də

yura. Ku nɛtu dǎn pɪn, tɛ nɛdu mama pwìú batwa, vǎn nɛdu jigə nɛzonu. Yá yuturi pwìú batwa, vǎn nɛdu jigə yikunu. Titun dɛ pwìú batwa, vǎn nɛdu jigə yikunu.

¹³ À kùù ywǎn à na zunpuu, ku wulə yu nə ban ban, ku pəri. À nì dɛ ku baa ku kə yu nə, ku wú: «Máná tɛ, malikɛ batwa tɛ duən tɛ nə wá wúrú tɛ nabwanan batwa tɛ, lɛɛ wá bà, lɛɛ wá bà, lɛɛ wá bà, tia yuu ləzoni yuu wa.»

9

Bonu nii nabwana tɛ wúrú yoo

(Apokalisə 16.10-11)

¹ *Malika bonu nii nyiən tɛ wúrú ka nabwana. À nɪ kacilacɔ, ku nan yu nə, ku tu tia. Ba pɪn ku buu tɛ, ku dǎn nə lù zənzən tɛ borbiu. ² Ku sùrí buu tɛntɛ, nywìń ga nan ku wa, tɛ dì yu nə. Tɛ nywìń tɛ yɪ ndə mənvoɔ nəfaru nywìń nə. Buu tɛ nywìń tɛ pɪn, yɪcau tɛ dɛ lanworu tɛ jì yikunu. ³ Jərən nan nywìń tɛ wa, tɛ sú tia. Yá ba dǎn pɪn tɛ cwan, ka nə yɪ ndə nuja cwan nə. ⁴ Ba dǎn ga swìn tɛ con, tɛ dǎn ká fwa lwanɪ tia yuu gau tɛ yura, nə à yèé wolɪu nɛdu yura, nə à yèé tiú nɛdu yura. Yá tɛ dǎn nə wǎá lwanɪ tɛ fwa lià tɛ yura, ba nə ba Yu tɛ jə ba télé nə. ⁵ Ba wà tɛ diàn pɪn, sə tɛ gu lià tɛntɛ, ba dǎn nə pɪn tɛ cwəŋə, sə tɛ kə ba càn wa, cànì bonu. Yá càn tɛntɛ, tɛ nə wá kə ba nə, wá yà ndə nèn nə dɪja liù nɛtu. ⁶ Ku máná tɛntɛ wa, ləzoni wá pià tian, yá ba ga bá na tɛ, abada. Ba wá pià, sə ba tɪ, tian ga wá dəri, tɛ va yiɲunɪ, tɛ yá ba. ⁷ Tɛ jərən tɛntɛ yɪ ndə səsən nə, ba nə tanɪ, sə ba ja va kùù. Tɛ yun wa, wiən duən ya wulə lá, tɛ nə yɪ ndə síán yupurən nə, tɛ yɛɛ ga yɪ ndə ləzoni yɛɛ nə. ⁸ Tɛ yukuran tɛ yɪ ndə kana yukuran nə, yá tɛ yelə ga yɪ ndə gərən yelə nə. ⁹ Tɛ nyuna tɛ yɪ ndə pamana lugu gǎnù nə. Yá tɛ vǎnà tɛ kwirə yɪ ndə kùù bwərə tɛ, səsən nə dáá nə yǎá vaŋa, tɛ

ja dæri, tæ vələ kùù. ¹⁰ Tæ yà jə dəbəlæ dæ tæ suran ndæ nɪja nə. Ku ga yɪ tæ dəbəlæ tæ wa nə, tæ diàn tæ naɲa, tæ ma kəni càn ləzoni nə, ku ja vələ cànì bonu. ¹¹ Tæ pìú nə yɪ *Sítana malíka tæ, ka nə ywàɲá buu tæ, ku dèí nə lù zənzən, tæ yuu. Ebərə-ba sugu wa, ba boɲə ka “Abadun*f1*”, *Gərekə-ba dæ sugu wa, ba boɲə ka “Apulɪun.”

¹² Təntən lɛɛ tæ kèí. Nèí, lɛɛ bələ duən, tæ nə wá bà ku kwa nə.

Bardu nii nabwana tæ wúrú yoo

(Apokalisə 16.12-16)

¹³ *Malíka bardu nii nyiən tæ wúrú ka nabwana. À dàí ma nì kori don, ku swìn, ku naɲa síán *joɲi kúrí nanyɔran bania tæ con, ku nə wulə Yu yáá con. ¹⁴ Kori tæ dàí swìn malíka bardu nii nyiən tæ con, ka nə jə nabwana tæ, ka wú: «Kùrí malíke bania tæ, ba nə vwə dæ banzala mɔnaa nəfaru tæ nii nə, ba nə boɲə “Əfəratə.” » ¹⁵ Yá ba dàí kùrì malíke bania tæ, tæ nə ken tæ sírí, tæ dàní ku bɪnɪ tæ, ku cànà tæ dæ ku máɲá təntə tətə, ku dun tæ. Tæ ken tæ sírí, sə tæ gu ləzoni pwìú batwa wa vàn nədu don tia yuu wa. ¹⁶ À nì dæ, ba swìn pamana tæ nii, ba nə dīgà səsen tæ, ba bɪrɪ nə. Ba swìn dæ ba yɪ lià miliyun biələ. ¹⁷ Mə ku tæ, Yu nə pa, à na tæ nə yɪ nətu. À nɪ səsen dæ lià nə dīgà tæ yuu, ba lià tæ yà zua pamana lurən ganən. Lurən təntə yɪ nəsiən, ndæ mən nə. Tæ ga yɪ pùpòdè ndæ nywìí nə. Tæ mù nə yɪ səmun ndæ jirəbuu nə dæ. Səsen tæ yun yɪ ndæ gərən yun nə. Tæ níó wa mən dæ nywìí dæ jirəbuu nə naɲa lá. ¹⁸ Tæ wiən batwa təntə gua ləzoni pwìú batwa vàn nədu tæ don. Tæ gua ba dæ mən, dæ nywìí, dæ jirəbuu tæ nə naɲa tæ níó wa. ¹⁹ Səsen tæ diàn yà yɪ tæ naɲa tæ níó tæ dæ tæ dəbəlæ wa. Tæ dəbəlæ tæ yɪ ndæ dɪja nə, tæ ga jə yun dæ. Yá ku yɪ tæ yun təntə nə, tæ ma fwa ku tæ nə lwara.

²⁰ Ləzoni tæ, ba nə ga lá, wiən təntə nə wà gwɪ, wà sè ba vəvəri ba kwa, ba ma sá wiən tæ ba nə fwa dæ ba jun. Ba tæ pɪn dun *zinə tæ nə dæ

wonwanan tə nə, ba nə fwa də ba tətə jun. Tə wonwanan təntə yɪ ba fwa də síán, nə à yèé də cɪnɪa, nə à yèé də kapana, nə à yèé də daran. Tə wonwanan təntə yíá ba na, tə zɪan ba nèn, tə ga wàrɪ tə vɛli. ²¹ Ba mù ləzoni təntə wà ba kwa vəvəri, ba ma sá ba lagurɪ tə, nə à yèé ba cɪrɪ tə, nə à yèé ba ka pèn duən vɛɛ vɛɛ tə, nə à yèé ba ŋwìràn tə.

10

Sagibiə tə, ba nə pɪn Zwan nə tə, yoo

¹ À nɪ *malɪka don, ka nə jə diàn zənzən də ka nan Yu sàń ka cwi. Ka yà pəpəri ka tiàn də bakwan. Ka yuu con kɪkarɪ də dwà sùú, ka yáá tə ga yɪ ndə yɪcau nə. Ka nəɛ tə də yɪ ndə ywəŋə nə, tə nə jə mən. ² Ka yà jə sagibiə, ku nə sùrí ka jun wa. Yá ka dàń tún ka jɪzən naa tə muu yuu wa, ka ga tún ka jɪgwiə naa tə tia yuu wa. ³ Ka dàń ga zìn ka kori, ka kə yu nə, ka bubwi ndə gəru nə yàá baa nətu tə. Ka nə bubwi nətu tə kwa nə, dwà baa nəɛ barpe. ⁴ Mánjá tə, dwà nə baa nəɛ barpe tə, à yà pià à púpúní, yá à dàń nì kori, ku nə nan Yu *sàń, ku swìn à con, ku wú: «Dàn ká púpúní ku tə, dwà tə nə baa nəɛ barpe ka swìn tə, n pa ba lwarɪ. Ja ku n con nə!»

⁵ Yá malɪka tə, à nə nɪ də ka zɪga yu nə, muu tə də tia tə yuu wa, dàń zìn ka jɪzən jun tə, ka te yu nə. ⁶ Ka dùè də Yu tə, ɸ nə wulə mu wa, mánjá də mánjá, ku nə ba zwè, ɸ nə fwa lanworu tə də wiən, tə nə wulə ku wa. ɸ fwa tia də ka yuu wiən, ɸ fwa muu də ku wa wiən. Ka dùè də Yu yɪrɪ tə ka swìn də, ku kùù ba ja ka lɪ mánjá, ka ma dàn. ⁷ Yá mánjá tə, malɪka barpe nii nyiən tə nə wá kə ka sírí, ka wúrí ka nabwana tə, ku mánjá tə wa, Yu dàń wá pa, ɸ cígá tə, ka nə sègè, tun ka nii sú. ɸ yà swìn ku suywánjú təntə, ɸ tùtùnà tə nə yɪ ɸ nii *sùsùnà tə con.

⁸ Yá kori tə, à yà nə nì, də ku nan Yu sàń, ku biàn tə, kùù pií ku swìn à con, ku wú: «Vɛli, n jon sagibiə tə, ku nə sùrí, ku wulə malɪka tə jun wa,

ku nə zɪga yu nə, muv tə də tia tə yuu wa.» ⁹ À dān vɛli malɪka tə con, à ga swìn ka con, sə ka pa nə sagɪbiə tə. Ka ma swìn à con, ka wú: «Jon ku, n ləri! Ku wá yà lán lán n nii wa, ndə turan nə. Yá ku ga wá yà càn kwalu kwalu n pùé wa.» ¹⁰ À jon sagɪbiə tə, malɪka tə jun wa, à ləri. Ku yɪ lán lán à nii wa ndə turan nə. Yá à dān nə ləri ku, ku jigə càn kwalu kwalu à pùé wa. ¹¹ Ba dān ma swìn à con, ba wú: «N mɛ, sə n tə bwé n swìn Yu nii sùràn tə, n bɪrɪ luu nii kapupu là nə, də luu dwíé kapupu, də nəndəli yiri kapupu là nə, də pègá kapupu nə.»

11

Llà bələ tə, ba nə swìn cígá tə, ba bɪrɪ

(Likə 21.24)

¹ Ku kwa nə, ba dān pɪn nə muv, ba nə ma maɲa wiən, ku nə yɪ ndə dabiə nə, ba ga swìn, ba wú: «Zàn, n ga man Yu *dìè tə də ku *joŋi kúrí tə, sə n gəlì là tə nii, ba nə wulə ku wa, ba pɪn dun Yu nə. ² Yá Yu dìi tə yáá tə nə dà, kàrá con tə mù, dān ká man ku. Yu pɪn yáá təntə, luu dwíé tə duən tə mama, ba nə yəri Zwezi-*Kərisə nə luu wa. Dwíé təntə wá nɪɲa tiw tə, ku nə yɪ Yu nyiən tə də nɛɛ, halɪ, ku ja vələ cànì sapwilə də bələ.» ³ Yu kúb ma swìn, v wú: «À wá tun à là bələ, ba nə wá swìn à cígá tə, ba bɪrɪ. Ba là təntə zua pucunɪ ganan. Ba wá swìn à sugv, ba bɪrɪ là nə dian mùrù də biələ də sapwɪtwa (1 260).» ⁴ Ku là bələ təntə nə yɪ ndə *oliviye tián bələ tə də canzɪlan bələ tə, tə nə zɪga *Yuu-Tiu yáá con, v nə dó pàrì tia yuu wa. ⁵ Liù nə pìà, sə v fwa ba lwani, mən yáá nan ba nii wa, tə dó ba duɲa tə, tə cùgù. Cígá, liù nə pìà, v cùgù ba, ku mɛ, sə ba gu ku tíú nətɪ. ⁶ Ba jə diàn, sə ba ja, dwà ka dān ká nà, máná tə wa, ba nə wá swìn Yu nii sùràn tə. Ba ga jə diàn, sə ba lwàn níá, ba pa, tə jì jana. Ba jə diàn də, sə ba kə yacara yiri mama là tə nə, ba nə wulə tia yuu wa, máná tə mama, ba nə

pià.

⁷ Mánjá tə wa, ba nə wá swìn Yu sùràn tə, ba zwè, wojjiru tə nə naŋa *Sítana malíke buu tə wa, ku dèń nə lu zənzən tə, dāń wá zıgı ba nə də kùù. Yá ku wá ta ba, ku dé, ku ga wá gu ba. ⁸ Ba wá yá ba tıga tə kanporu wa, tuv nəfaru*f1* tə tətəŋi wa. Mə ku bwálí təntə wa nə, ba paa ba *Yuu-Tiu dagarv yuu wa. Yıra tə tə nə bırı tuv təntə nyınyıga nə yı *Sodəmə də *Ezwipətə. ⁹ Luu nii mama lià, dwíó yiri mama lià, də nəndəli yiri mama lià, də luu dwíó tə mama wa, wá ywàń ba tıga tə, ku ja vələ dian batwa də fan. Yá ba bá pa cwəŋə, sə ba gùrì tıga təntə. ¹⁰ Tia yuu ləzoni wá jwə ba mù lià bələ təntə tian tə yırı, ba ga wá yà pupwən wa. Ba wá tun zılé wiən duən yıra, ba mù Yu nii *sùsùnà bələ təntə tian tə yırı, ba nə wuwalı tia yuu ləzoni zənzən tə yırı.

¹¹ Dian batwa də fan tə kwa nə, Yu pın *sıŋu, ku nə pın mu, bà ku zu ba, yá ba dāń ga zàn, ba zıga ba nəe nii nə. Fən nəfarv dāń zva lià tə, ba yà nə ywàŋá ba. ¹² Ba nì kori tə nə jə diàn də ku baa, ku nan yu nə, ku swìn ba con, ku wú: «Á dia yəbə!» Yá ba dāń dıgà yu nə bakwan wa, ba duŋa tə ga na ba. ¹³ Ku mánjá tə wa, tia vuvugu zənzən, yá tuv tə pwıú fugə vən nədu buburi duən yuu wa. Ləzoni mùrù barpe (7 000) tıga, ku mù tia tə vuvugu təntə wa. Fən zva ba duən tə, ba ga pa dun Yu nə, v nə wulə v sàń nə.

¹⁴ Bələ nii ləe tə kèń. Ku kwa nə, nèn, batwa nii ləe tə nə, tə nə wá bà síún síún.

Nabwanan barpe nii nyiən tə yoo

(Apokalisə 12.10, 19.6)

¹⁵ *Malıka barpe nii nyiən tə wúru nabwana. Kwərə tə nə jə diàn baa, tə nan Yu sàń nə, tə wú:

«Luu pàrì tə twi nə *Yuu-Tiu də *Kərisə tə, v nə tun wá. U wá dé pàrì, mánjá də mánjá, ku nə ba zwè.»

¹⁶ *Nəkwina sapva də bania tə, yà nə jèé Yu yáá nə padaran tə yuu wa nə tə, tua ba yáá yuu, ba wulə ba pın dun Yu nə. ¹⁷ Ba swın, ba wú:

«Nə kəni n lèè Yuu-Tiu Yu tə, n nə wulə tə me yuu wa. N mù nə yın lá, n mù ga nə wulə. Nə pın mú dun, n diàn nəfaru tə nə pın, n tún n pàrì tə yırı. ¹⁸ Luu dwíé tə mama lıŋa yà zaŋa Yu yuu wa. Yá Yu lıŋa tə twi síún nə. Máná dàń yí, sə n bə̀rì tıga bura. N wá ɲwín n tutunbia tə, ba nə yı n nii *sùsùnà tə. N wá ɲwín là tə mama, ba nə yı n mù nə tı, də ba tə mama, ba nə zılí mú, də ba ləzwənbii də ba ləzwənfaran. Yá n dàń wá cùgù là tə, ba nə cùgà tia tə, ku máná təntə wa.»

¹⁹ Ku kwa nə, Yu *diè tə Yu sàń tə wa dàń súrí. Yu diè tə wa, *nimaru daka tə nan yía yuu. Dwà pıplı, ka baa, kwərə duən də yın lá, tia tə də ga vıvaga, dwakafına də ga nan, tə lwá də diàn.

12

Kan də tıdən yoo

(Apokalisə 2.26-27, 1 Piyerə 5-8)

¹ Ku kwa nə, mımınu nəfaru don nan yu nə. À nı kan don, yıcau tə nə pəpəri wá ndə gànù nə, cànà tə ga wulə v nəe dèń. Kacılacə fugə bələ nə yı v dun yupuu, ku nə púé v yuu nə, ku kıkarı. ² Kan tə yà jə pùé v pìà, sə v lırı. Yá v lırı tə càn dàń pın, v bubwi.

³ Mımınu tə don kúù nan yu nə. Nèń, ku yı tıdən nəfaru, nəsıan ndə mən nə, ku nə jə yun barpe də nyuran fugə nan ku zıga. Dun yupuu yà púé ku yuu tə nədu mama nə. ⁴ Ku dəbəli bıbalı kacılacə, tə nə wulə lanworu tə wa, pwıú batwa vən nədu don, ku lwá tia yuu wa.

Tıdən tə dàń zàn ku zıga kan tə, v nə pìà v lıra tə yáá con. Yá máná tə wa, v dàń nə lırı, ku pìà ku dó v bìú tə. ⁵ U lırı bìú. U mù bibəe təntə nə wá

dé pàrì luv dwíé tē mama yuu wa dē diàn. Yá ba dān jon v bìú tē, ba ja va Yu con, v padau tē nē wulə lá. ⁶ Kan tē ma dēri, v va kasɔ lanworu wa. Yu yà kwen bwálí, v tún v nē lá, sē v lɪ v nii nē, ku ja vələ dian mūrù dē biələ dē sapwɪtwa (1 260).

(Likə 10.18-19)

⁷ Kùù dān twi ku zàn Yu *sàn nē. *Malíkē piú Miswelə dē v malíkē tē ta tɪdən tē. Tɪdən tē dē dē ku malíkē ta ba zɪɣɪ ba nē. ⁸ Yá tɪdən tē dān nē wà diàn dí ba yuu wa. Ku dē ku malíkē tē yà kùù ba tē bwálí jē Yu sàn nē. ⁹ Ba dɪlɪ ku mù tɪdən nəfaru təntə dē ku malíkē tē tia yuu wa. Ku mù nē yɪ dən nədwan tē, ba nē boŋə “*zini piú”, nē à yèé *Sitana. Ku mù nē gɪɣarɪ lià tē nē wulə tia ka tē yuu mama wa.

¹⁰ À dān nì kori, ku nē jē diàn dē ku baa, ku nan Yu sàn nē, ku swìn, ku wú:

«Síún nē, mánjá dān yí, yá Yu jon lià Sitana jìàn wa. Nē nyina Yu biri v diàn tē, dē v pàrì tē nē yɪ nətu. *Kərisə tē, v nē tun tē, dē ga biri dē, Yu ken diàn v jun wa. Ku yɪ cígá, ba yigu liù tē, v nē swìn v zɪga ba tē nē, ba nē yɪ nē nubia Kərisə yɪrɪ, ba lɪ Yu sàn nē, ba dɪ tia. Ʋ mù nē yɪ liù tē, v yà nē swìn, tɪjaŋa sùràn v ma zɪga ba nē, tɪtɪn dē yɪcau, nē nyina Yu tē yáá con. ¹¹ Nē nubia tē dí diàn v yuu wa, liù tē nē yɪ ndə pabie nē tē jana tē yɪrɪ, tē nē lwá dē Yu sugu tē yɪrɪ, ba nē swìn ba biri lià nē. Ba sè, sē ba ja ba mu tē, ba ma lárí tian. ¹² Ku mù tē yɪrɪ, á yana pupwən wa, á mù lià tē, á nē wulə Yu sàn tē wa. Yá lɛɛ dān wá yà tia yuu wa dē muv wa, Sitana nē cúé tē con tē yɪrɪ. Ʋ súé dē lɪŋa, v nē yèé dē, v mánjá tē nē ga kùù ba dáá yɪrɪ.»

¹³ Mánjá tē, tɪdən tē nē nɪ dē ku yɪ, ba dɪlɪ ku tia tē yuu wa, ku pe kan tē nē lɪrɪ bibɛɛ tē, ku kə ku yáá. ¹⁴ Ba pɪn zənpurən nəfaru vànà bələ kan tē

nə, sə ʋ ma pəri, ʋ va kasɔɔ lanworu wa. Bwálí wulə kasɔɔ lanworu tɛntə wa, Yu nə wá lɪ ʋ nii nə lá, bɪna batwa də fan. Yá ʋ də ku mù tɪdɛn tə kúù bá boli duən. ¹⁵ Tɪdɛn tə tɔnɪ níá ku lɪ ku nii wa, ndə munaə nə, kan tə kwa con, sə tə pè wá tə ja jén. ¹⁶ Yá tia tə san kan tə nə, ka sùrí ka nii, ka nyun munaə tə, tɪdɛn tə nə tɔnɪ ku lɪ ku nii wa, ku dɪlɪ kan tə kwa tə. ¹⁷ Tɪdɛn tə lɪɟa zàn kan tə yuu wa, ku dǎn ma pǐi ku va ku zìn kùù kan tə bia gɪganɪ nə, ba nə yɪ là tə, ba nə sè ba twá Yu *nii yìèn tə nə, ba ga swìn Zwezi sùràn tə, ba bɪrɪ də ba twá tə nə. ¹⁸ Tɪdɛn tə dǎn ma kèñ ku va, ku zɪga muv tə vǎn nə.

13

Wojijiru tə nə nan muv tə wa nə yoo

(Apokalisə 17.3, 7-17)

¹ Ku kwa nə, à nɪ wojijiru don də ku naŋa muv wa. Ku wojijiru tə yà jə nyuran fugə də yun barpe. Nyuu nədu mama yuu yà jə dun yupuu. Yun tə nədu mama yuu wa, yɪra yà púpóná, tə nə twɪn Yu.

² Wojijiru tə, à nə nɪ tə, yɪ ndə gwiə nə. Ku nəe tə yɪ ndə kənyenkuru nəe nə, ku nii tə ga yɪ ndə gəru nii nə. Yá tɪdɛn tə dǎn pɪn ku diàn tə, də ku padau tə, də pàrɪ nəfaru wojijiru tə nə. ³ À nɪ wojijiru tə yuu nədu don, ba nə mà ba tún nuran ku yɪra, ndə ku wá tɪ. Yá ku nuran tɛntə dǎn pǐi tə zùrɪ. Ku dǎn gwárí tia yuu là tə mama, ba ga dəri ba twá ku kwa. ⁴ Là tə mama dǎn tua tia tɪdɛn tə yáá con, ba pa ku dun, ku nə pɪn pàrɪ wojijiru tə nə yɪrɪ. Ba tua tia wojijiru tə yáá con, ba ga wú: «Lìù tɛlɛ, ʋ nə mɛ də wojijiru tə. Lìù tɛlɛ ʋ nə wǎá ʋ tɛ, ʋ zɪga ku nə.»

⁵ Ba pɪn cwəŋə wojijiru tə nə, sə ku swìn fwiə sùràn də yìèn tə nə twɪn Yu. Ba tə kúù pɪn ku cwəŋə, sə ku dé ku pàrɪ tə, cànɪ sapwilə də bələ. ⁶ Ku dǎn sùrí ku nii, ku swìn yìèn, ku ma twɪn Yu də ku cùgà ʋ yɪrɪ tə nə, də ku

twɪn ʊ bwálí tə, ʊ nə wulə tə, də lià tə nə wulə Yu *sàń tə wa. ⁷ Ba pɪn kʊ cwəŋə, sə kʊ ta kʊ zɪɡɪ lià tə nə, ba nə yɪ *Kərisə nə tɪ, sə kʊ ta ba, kʊ dó. Ba pɪn kʊ cwəŋə, sə kʊ dó diàn dwíó dəkurən yiri mama lià, lʊʊ nii mama lià yuu wa, nəndəli yiri mama lià yuu wa, də lʊʊ dwíó tə mama wa. ⁸ Yá tia yuu lià tə mama, ba yɪra nə wà púpóní mu sagɪ tə wa, mánjá tə wa, Yu nə fwa lʊʊ, dāń wá tu wojijiru tə yáá con, ba pa kʊ dun. Mu sagɪ təntə yɪ *pabiə tə, ba nə ken siú ka bian nə tə, nə tɪ kʊ.

⁹ Liù mama dāń mɛ, sə ʊ kə diàn, ʊ súrí ʊ zian, sə ʊ ma cugv zəni!

¹⁰ Liù tə, ʊ nə mɛ, sə ʊ duŋa ja wá, ba ma fwa kʊ tə, ba nə pià, ba wá ja kʊ tíú tə. Liù tə, ʊ nə mɛ, sə ba gu də kwatara siú, ba cíɡá wá gu kʊ tíú də kwatara siú. Kʊ nətu tə yɪrɪ, lià tə nə yɪ Kərisə nə tɪ tə mɛ, sə ba kə ba waa Zwezi-Kərisə nə, ba ga ja pínú wuuu, ba dān ká pií, ba kə ba kwa.

Wojijiru tə nə nan tia tə yoo

(Apokalisə 19.20, 14.9-11)

¹¹ Kʊ kwa nə, à nɪ wojijiru don də kʊ nan tia kʊ di. Kʊ yà jə nyuran bələ, tə nə yɪ ndə pabiə nyuran nə, kʊ ga swɪn ndə tɪdən nə.

¹² Kʊ yà wulə kʊ tuŋa də muv wojijiru pàrɪ tə, kʊ mù muv wojijiru tə yáá con. Yá kʊ dāń kálú tia də ka yuu ləzoni mama, kʊ pa ba tu kʊ yáá con, də ba pɪn dun kʊ mù təntən wojijiru təntə nə. Mə kʊ mù muv wojijiru təntə, nə ba mà ba tún nuran kʊ yɪra, ndə kʊ wá tɪ. Yá nuran təntə dāń pií tə zùrɪ. ¹³ Kʊ mù bələ nii wojijiru təntə yà fwa diàn mumunan nəfaran. Kʊ yà pɪn, mən nan yu nə, tə cú tia yuu, ləzoni tə mama yíá yuu. ¹⁴ Kʊ yà gɪgarɪ tia yuu ləzoni də kʊ diàn mumunan tə, ba nə pɪn kʊ cwəŋə, sə kʊ fwa muv wojijiru tə yáá con. Kʊ dāń swɪn tia yuu ləzoni con, sə ba ma wojijiru təntə, ba nə za də kwatara siú, ba tún nuran kʊ yɪra, kʊ ga pií kʊ bwin tə nyunyɪga. ¹⁵ Ba pɪn cwəŋə bələ nii wojijiru tə nə, sə kʊ pa təntən nyiən tə nyunyɪga tə, ba nə ma tə wàní, kʊ na mu kʊ sií, sə kʊ wàní kʊ swɪn yièn.

¹⁸ Mə yəbə nə wubɒŋa mɛ, sə ku ya lá. Lìù tə, v nə jə yənu, nə wàá ku nanba təntə dən v jəli v lwarɪ. Ku nanba təntə bɪrɪ bæ ləzoni nanba. Ku yɪ biərdu də sapwɪtwa də bardu (666).

¹ Á cuga zəni, à ywǎn də à na, *pabiə tə, ka zɪga yu nə paan tə, ba nə boŋə “Siyon*f1*”, tə yuu wa. Lià mǝrǝ bíí də mǝrǝ sapwilə də mǝrǝ bania (144 000) yà wulə də wá, ba yà nə jə v yiri tə, də v nyina Yu tə yiri tə, tə nə púpúní ba tǝlǝ nə. ² À nì kori, ku nə nan Yu sǎn, ku yɪ ndə níá nə dáá, tə ga dəri tə biàn, ku ga yɪ ndə dwà nə baa də diàn. Ku kori tǝntə, à nə nì tə, yɪ ndə kúnkólú gwàgá nə wulə, ba dwí ba banu. ³ Ba dǎn wulə ba nuŋə nuŋə nədun Yu padav tə yáá, də wiən bania tə, də *nəkwina tə yáá con. Liù tǝlǝ, v nə wàá ku nuŋə tə v kwè, də ku nə tà ba lià mǝrǝ bíí də mǝrǝ sapwilə də mǝrǝ bania (144 000) tǝntə, Yu nə yè lià tǝntə v jon, tua ka tə yuu wa. ⁴ Ba lià tǝntə yɪ lià tə, ba nə cìgà ba tiàn nə, ba wà durən yièn fwa. Ba yɪ lià tə, ba nə wà cwàri də duən. Ba yɪ pabiə nə tə kwa bwálí tə mama, ka nə vǝlə. Yu yè lià tǝntə v jon ləzoni pwéré wa, sə ba ya v mù Yu də nə, tə tǝntən lià. ⁵ Kun kun wà ba lià tə nii wa nan. Ba yɪ lià tə, ba nə ba yoo jə, ba nə wá caga ba nii nə ku yiri.

Yu bura tɔ yoo

(Tɔtɔnan 17.30-31, Apokalisɔ 18, 19.19, 20)

⁶ Ku kwa nɛ, ɛ nɪ *malɪka tɔ don, ka nɛ pɛri, ka nan yu nɛ ban ban. Ka yà jɛ sɔyɔwɔ́nɔ́, ku nɛ wulɔ mánǎ́ mama wuuu, sɛ ka swìn ka bɪrɪ tɪa yuu lɛzoni nɛ, dɛ luv dwíɔ́ tɔ mama wa nɛ, dɛ dwíɔ́ dɛkurɛn yiri mama là nɛ, dɛ nɛndɛli yiri mama là nɛ, dɛ luv nii mama là nɛ. ⁷ Malɪka tɔ zìn ka kori, ka kɛ yu nɛ, ka wú: «Á zílɛ Yu, sɛ á ga pa wá dun, mánǎ́ nɛ yí, sɛ ɔ bɪrɪ lɛzoni bura yiri. Á twɪa Yu yáá con, á pa wá dun. Ʋ mù nɛ fwa lanworu, dɛ tɪa, dɛ muv, dɛ nabuliyɪa.»

⁸ Malɪka don, ka nɛ yɪ bɛlɛ nii nyiɛn, twá tɛntɛn nyiɛn tɔ kwa, ka bà, ka swìn, ka wú: «Ku tua, *Babulɔnɛ tɪv nɛfaru tɔ tua buuu. Babulɔnɛ tɪán yà pɪn luv dwíɔ́ tɔ mama wa, twá ba nɛ, ba pɛní duɛn vɛɛ vɛɛ, ndɛ ba nyuan swana ba bubunɪ.»

⁹ Malɪka don, ka nɛ yɪ batwa nii nyiɛn, twá tɛntɛ nyiɛn bɛlɛ tɔ kwa, ka bà, ka zìn ka kori ka kɛ yu nɛ, ka wú: «Lìù tɔ, ɔ nɛ tua wojijiru tɔ dɛ ku nyinyiga tɔ yáá nɛ, ɔ pa ku dun, yá ku tíú ga jɛ wojijiru tɔ mɪmɪnuv ɔ tɔlí nɛ, nɛ ɛ yèɔ́ ɔ jun nɛ, ¹⁰ Yu lɔɔa tɔ wá zàn ɔ yuu wa zɛnzɛn, ndɛ ba nɛ lwa swana tɔ nɛ dá wùrú zuɔa wa, ba pa ɔ nyun, ɔ bubunɪ. Yá Yu dàń wá kɛ ku lɛzwɛnyiri tɛntɛ, mɛn dɛ jirɛbuu wa, sɛ tɔ pa ɔ dɛ càn, ɔ malɪkɛ tɔ dɛ *pabɪɛ nɛ tɔ yáá con. ¹¹ Mɛn tɔ dàń wá kɛ càn ba lɛzwɛnyirɛ tɛntɛ nɛ, tɔ nywìń ga zaɔa, mánǎ́ dɛ mánǎ́, ku nɛ ba zwè. Yá ba ba na sìɔ́ yɪcau dɛ titun. Ba yɪ là tɔ, ba nɛ tua wojijiru tɔ dɛ ku nyinyiga tɔ yáá con, ba pa ku dun. Yá ba yɪ là tɔ, ba nɛ sè, ba pa ba fwa wojijiru tɔ yiri tɔ mɪmɪnuv ba yira.»

¹² Ku nɛtu tɔ yiri, là tɔ, ba nɛ yɪ Kɛrisɛ nɛ tɪ, ba nɛ twá ɔ *nii yìèn tɔ nɛ, ba ga kɛ ba waa Zwezi-Kɛrisɛ nɛ mɛ, sɛ ba ja pínú wuuu, ba dàn ká pɪí ba kɛ ba kwa.

¹³ À nì kori, ku nə nan Yu *sàń ku nə swìn, ku wú: «Púpúní, ku nə zıgı síún nə: Pupwən lià nə yı lià tə, ba nə ken ba waa *Yuu-Tiu nə, ba ga zıgı lá ba ti. Yu-*Sıju tə le, ku wú: “Ku yı cígá, ba wá sîi ba tutuncaran tə jun wa, yá tə mù dàń nə bırı ku tə, ba nə tun.” »

(Matia 13.37-43)

¹⁴ À nə ywàńá də nèn, bakwan nəpon nə, won yà jèé ku bakwan tə yuu wa, ku yı ndə ləzwənə nə. U yà púé síán yupuu v yuu nə, v ga jə sɪkwara, ku nii nə yı fula fula, v juun wa. ¹⁵ *Malıka don nan Yu *dìè tə wa, ka zìn ka kori, ka kə yu nə, ka swìn liù tə con, v nə jèé bakwan tə yuu wa, ka wú: «Tia yuu wiən tə bıga tə me, sə ba gian tə. Máná yí, sə ba gian tə! Ja n sɪkwara tə, n ma gian tia yuu wiən tə!» ¹⁶ Liù tə, v nə jèé bakwan tə yuu wa, dàń ma ja v sɪkwara tə, v ma gian tia yuu wiən, tə nə bıga tə mama, v zwè.

¹⁷ Malıka don də tə nan Yu dìè tə wa, ku nə wulə Yu sàń nə. Ka də yà jə sɪkwara, ku nii nə yı fula fula. ¹⁸ Malıka don də ka nə jə diàn mən yuu wa, nan *joŋi kúrí tə con, ka zìn ka kori, ka kə yu nə, ka swìn ka tə nə jə sɪkwara tə, ku nii nə yı fula fula tə con, ka wú: «Ja n sɪkwara tə, ku nii nə yı fula fula tə, n ma pùrí kacan, tə nə bıga, tə wulə tia yuu diven tián kára tə wa!» ¹⁹⁻²⁰ Malıka tə dàń ma ja ka sɪkwara tə, ka ma pùrí kacan, tə nə wulə tia yuu wa, Ka tì tə, ka lwá zɔɔ nəfaru wa, sə ka kaŋa tə, ka ma fwa swana, sə ku bırı Yu luŋa nə zaŋa zənzən nətu. Ba titaga diven tián biá tə. Zɔɔ nəfaru tə wa ku yà nə wulə tiv tə nii nə. Jana nan ku bwálí tə wa, tə dəri tia, tə va kilometərə biətwa (300). Diven tián biá níá təntə yı jana, tə dàń ga luŋə zənzən. Susan nə zua tə wa, tə wá dì, tə yí ka nii kwìón.

15

Malıke barpe tə də yacara yirə yirə tə yuu yoo

(Apokalisə 19.1-4, 11.19, 16.1)

¹ Ku kwa nə, à nɪ mɪmɪnu don lanworu tə wa, ku yɪ nəfaru, ku ga yɪ wobalu. À nɪ *malɪkɛ barpe, tə nə wàá yacara dəkurən barpe tə kəni lià nə. Mə tə m̀ talikwa yacara barpe tə nə Yu wá twá, u ma tun u luja tə, u pa tə sú.

² Ku kwa nə, à tə nɪ won ndə muu nə, ku nə yɪ ndə zəŋə nə, ku nə gúlí də mən. À nɪ ba tə, ba nə dí diàn wojijiru tə də ku nyɪnyɪga tə yuu wa də won tə, ku yɪrɪ tə nə yɪ nanba tə, yuu wa. À nɪ ba də ba zɪga ku m̀ muu tə, ku nə yɪ ndə zəŋə nə tə, yuu wa, ba ga jə kunkwələn tə, Yu nə pɪn ba. ³ Ba wulə ba nuŋə Yu tutunbiu *Moyizə nuŋə tə, tə nə yɪ liù tə, u nə yɪ ndə *pabiə nə tə də nuŋə, Ba nuŋə ba wú:

«Nə *Yuu-Tiu Yu, n wulə tə mɛ yuu wa, ku tə n nə fwa dáá, ku ga jə fira. N yɪ dwíó tə mama pìu luu wa. N coŋi tə yɪ mənəmənə, tə ga yɪ cígá coŋi də. ⁴ Yuu-Tiu, lià tə mama zílí mú, ba ga bwi n yɪrɪ tə nə. N m̀ cɪcɪ nə yɪ Yu. N dwə won mama. Luu dwíó tə mama wa wá bà, ba tu n yáá con, ba pa mú dun, ba nə wá na n tutunan, tə nə yɪ cígá tə yɪrɪ.»

⁵ Ku m̀ təntə kwa nə, à nɪ Yu *diè tə, ka sùrí Yu *sàń nə, yá Yu *nimaru gansili tə ga wulə ka wa. ⁶ Malɪkɛ barpe tə nə kəni yacara dəkurən barpe lià nə tə, nan Yu diè tə wa. Tə zua ganpwənə, tə nə tunə mən, tə ga vwa síán vwərən tə nyuna nə. ⁷ Wiən banɪa tə wa won don pɪn síán wùrú zwun barpe, malɪkɛ barpe tə nə. Ku tə nə wulə wùrú zwun təntə wa, bɪrɪ Yu luja tə. U m̀ Yu nə wulə mu wa, mánjá də mánjá, ku nə ba zwè. ⁸ Yu dun tə də u diàn tə pɪn, nywɪń sú Yu diè tə. Liù mama yà kúb wàrì diè təntə wa u zwɪ, ku jə vələ mánjá tə, malɪkɛ tə yacara dəkurən barpe tə mɛ nə wá bà tə tun tə zwè.

Malike barpe tə də cən yirə yirə tə yoo

(Apokalisə 8.6-9.21)

¹ À nì kori, ku nə jə diàn də ku baa, ku nan Yu *diè tə wa. Kori tə swìn *malike barpe tə con, ku wú: «Á vələ, á lwá ku tə nə wulə wùrú zwun barpe tə tə wa, ku nə buri Yu lıja tə, tia yuu wa.»

² Təntən malıka tə vəli, ka lwá ka wùrú zıja tə tia yuu wa. Nuran kukwınan, tə nə wùrì báá báá báá, zən, tə tu lià tə yıra, ba nə jə wojijiru tə mımınu tə ba yıra, ba ga twı ku nyınyıga tə yáá con, ba pın ku dun.

³ Bələ nii malıka tə lwá ka wùrú zıja tə muu tə wa. Níá tə zən tə jì jana, ndə tıgı jana nə. Yá muu tə wa wiən tə də mama tıga.

⁴ Batwa nii malıka tə lwá ka wùrú zıja tə muneə də nabuliyıa wa. Tə də níá tə zən tə jì jana. ⁵ À dən nì də malıka tə, ka nə ywàŋá níá yuu wa, swìn, ka wú:

«N mù nə yı cıgá tíú. Yá n ga tə wulə wuuu. N mù nə yın lá fuən fuən. N mù cıci nə yı Yu, n nə dwə won mama. Ku yı cıgá, n buri yìèn tə tə bura, ndə ku nə me nətu. ⁶ Ba mù lià təntə gua lià tə, ba nə yı *Kərisə nə tı, də n nii *sùsùnà tə jana ga lwá tia. Yá síún nə, n dən pın níá tə jì jana, sə ba nyu. Ku mù nə me də ba.»

⁷ À dən nì kori, ku nə nan jıŋi kúrí tə con, ku swìn, ku wú:

«Ku yı cıgá, *Yuu-Tiu Yu tə, n nə wulə tə me yuu wa. N bura tə yı cıgá cıgá bura, ku ga me, sə ku ya nətu.»

⁸ Bania nii malıka tə lwá ka wùrú zıja tə yıcau tə yuu wa. Yıcau tə ma nı cwəŋə, sə ku dé lià tə də ku mən tə. ⁹ Ku bári tə dən dí lià tə zənzən, yá də ku nətu me, ba twın Yu də ba swìn sukukwınan ba pın u yırı tə nə. Yu təntə nə jə diàn, u mù nə pın yacara təntə yí ba. Yá ba lià tə ga wà sè ba vəvəri ba kwa, ba ma sá ba cuna tə, sə ba pa dun Yu nə.

¹⁰ Bonu nii malika tɛ lwá ka wùrú zɔŋa tɛ wojijiru tɛ padau tɛ yuu wa. Ku payuu tɛ zɛn ku jì yikunu bwálí. Lìà tɛ dàń ga dɔŋ ba nɛndələ ba yira nɛ wùrì yiri. ¹¹ Ba wulə ba twin Yu tɛ, ɔ nɛ wulə ɔ sàń nɛ, yawurə tɛ dɛ ba yira nuran tɛ yiri. Yá ba ga bá sè, sɛ ba vɛvəri ba kwa, ba ma sá ba tutunkukwɛnan tɛ.

¹² Bardɔ nii malika tɛ lwá ka wùrú zɔŋa tɛ Ʋfɛratɛ munaa nɛfarɔ tɛ wa. Ku níá tɛ zɛn tɛ dàń wɔ, sɛ tɛ yá cwɛŋə, tɛ pa pɛgá tɛ nɛ, ba nɛ naŋa yu yipɛan con ba biàn. ¹³ À nɛ *zinə batwa, tɛ nɛ yi ndə nyənswərən nɛ, dɛ tɛ naŋa tɛdən tɛ, dɛ wojijiru tɛ, dɛ kunkun sùsùndè nii nɛ. ¹⁴ Tɛ yi *zinə tɛ nɛ jə *Sitana diàn tɛ ma tɔŋa ɔ diàn mumɛnɔ. Tɛ mù zinə batwa tɛ vɛli tia mama yuu pɛgá tɛ con. Tɛ vɛli, sɛ tɛ kə ba duən yáá, sɛ tɛ ma ta kùb dɛ Yu tɛ, ɔ nɛ wulə tɛ mɛ yuu wa, dun nɛfarɔ tɛ nɛ, ɔ nɛ lɪ ɔ tún.

¹⁵ Yá Zwezi swìn à con, ɔ wú: «Á cɔga zəni, à biàn, sɛ à di á yuu ndə ŋwìàn nɛ. Pupwən liù nɛ yi liù tɛ, ɔ nɛ ba dwè ku mánjá tɛ wa, ɔ ga jə ɔ gànàn ɔ yira nɛ, ɔ dàn ká va dɛ yaswələ, sɛ ba na ɔ cavira.» ¹⁶ Zinə tɛ dàń ken pɛgá tɛ duən nɛ, bwálí tɛ wa, ba nɛ boŋə dɛ *Ebərə sugɔ, ba wú: “Arəmagedon.”

¹⁷ Barɛ nii malika tɛ lwá ka wùrú zɔŋa tɛ lanworu tɛ wa. Kori tɛ, nɛ jə diàn zɛn ku baa, ku nan Yu diè tɛ wa, padau tɛ con, ku swìn, ku wú: «Ku fwa, ku zwè!» ¹⁸ Dwà pipɛlɛ ka baa, kwərə duən dɛ yin lá, tia tɛ ga vuvugu. Ku nɛ zigi mánjá tɛ mama, ləzoni nɛ wulə tia yuu wa, tia yà tɛ wà vuvugu zənzən ku yí nɛtɔ. ¹⁹ Tɛ nɛfarɔ tɛ, ba nɛ boŋə *Babulɔnə tɛ, dàń pwè twərə batwa, yá dwíé tɛ lɔɔ mama wa tɛfaran tɛ mama dàń tua. Yu wà ku tɛ, Babulɔnə tiàn nɛ fwa tɛ yoo swèé, yá ɔ cùgù ba. Ʋ lɛŋa tɛ zàn ba yuu wa zənzən, ndə ba nɛ lwá swana ba sú wùrú zɔŋa, ba pa ba nyun, ba bubunɛ. ²⁰ Muɔ tətəŋi wa tian tɛ mama jén, yá pɛɛn tɛ dɛ kùb ba na. ²¹ Dwakafina nɛfaran nan yu, tɛ twɪ lià tɛ yuu nɛ. Tɛ dwakafina tɛntə nɛdɔ mama yà yi kilo dɛ kilo. Yá ləzoni tɛ dàń wulə ba twin Yu, dwakafina tɛ nɛ kəni

yacara ba nə yırı. Ba twin wá, tə yacara təntə nə dáá zənzən tə ja le tə yırı.

17

Kacwaran yáá tíú tə yoo

(Apokalisə 16.19, 18)

¹ Ku kwa nə, *malıke barpe, tə nə jə wùrú zwun barpe tə wa, malıka don twi ka swın à con, ka wú: «Bàá yəbə! À wá bırı mú bura tə nə wá ja kacwaran yáá tíú tə nətu. Ku mù kacwaru təntə yı tuv tə, ku nə lwè naconji kapupu nii nə. ² Tia yuu pègá tə fwa bacwan də ku mù kan təntə. Ku twá də v mù kacwaran yáá tíú təntə, tia yuu lià ma zu bacwan wa, ndə ba nyuan swana, ba bubuni.»

³ Yu-*Sıju tə cúó à yuu wa, malıka tə ga tì nə, ka ja va ka tún kasə lanworu wa.

Ku bwálí tə wa, à nı kan də v jəə wojijiru don nəstan mwin yuu wa. Ku yà jə yun barpe də nyuran fugə. Ku yıra mama yà súé də yıra tə nə púpúná, tə nə twin Yu. ⁴ Ku kan tə zua gansıan mwin də gansısınu. U nən v tian də sían də kapana wonanan də zanan. U yà jə sían wùrú zuŋa v jian wa. Ku sían wùrú zuŋa təntə yà súé də caviyien də durən, tə nə nan v kacwan tə wa. ⁵ Yırı don púpúní kan tə təlí nə, ku nə yı yosəgu. Ku yırı təntə nə yı *Babiləne tuv nəfaru. Ku mù nə yı kacwaran tə də tia yuu caviyien tə dəkuu. ⁶ À nı ku kan təntə də v nyua jana v sú, ndə swana nə jə wá. Jana təntə yı lià tə, ba nə gva ba nə yı *Kərisə nə tı, tə yırı, də ba nə swın Zwezi cígá tə, ba bırı tə yırı. À nə nı wá, ku gwárí nə. Ku cígá gwárí nə zənzən.

⁷ Malıka tə dən ma swın à con, ka wú: «Bèè nə pın, ku gwárí mú? Ku nə yı wojijiru tə nə jə yun barpe, də nyuran fugə tə, də kan tə, v nə jəə ku yuu wa yoo, à mù wá bırı mú ku yosəgu tə.

⁸ Wojijiru tə, n yà nə nı də ku wulə tə, kúè təlú. Ku dən nə wá pıí ku nan

buv tə, ku dèñ nə lù zənzən, tə wa, ku va jíún bwálí nə ku cùgè míámíán. Yá ku wá gwárí tia yuu ləzoni tə, Yu nə wà ba yura púpúní mu sagi tə wa, ku nə zigi máná tə, v nə fwa luv. Ku wá gwárí ba, də ba nə wá na wojijiru tə, də ku yin lá, ku ga kùbè təlè, yá ku tə wá pìi ku bà ku nan.

⁹ Mə yəbə nə yənu də wubuŋa me tə ya lá. Yun barpe tə biri pēen barpe tə, kan tə nə jèé tə yuu wa. Yá tə mù tətə nə kùbè biri pègá barpe tə də.

¹⁰ Ba pègá barpe tə wa, pègá bonu tua. Bardv nii piú tə tə wulə v dé v pàrì síún. Ba talikwa piú tə tə wà twi. Yá máná tə, v dāñ nə wá bà, v wá dé v pàrì tə máná mancın wa. ¹¹ Wojijiru tə, ku yà nə yin lá, ku ga kùbè təlè tə də tətə biri nana nii piú don. Ku də tətə yi pègá barpe tə wa piú don. Yá máná tə wa, ku mù nə wá bà, ku wá va jíún bwálí nə, ku cùgè míámíán.

¹² Nyuran fugə tə, n nə nı tə, biri pègá fugə tə, ba tə nə wà pàrì nı, sə ba dé. Yá ba wá na pàrì, ba dé lugu nədv də wojijiru tə. ¹³ Ba pubuŋa yoo yi nədv, ba dāñ ga pın ba diàn tə, də ba pàrì tə wojijiru tə nə. ¹⁴ Ba wá zìn kùbè də liù tə, v nə yi ndə *pabiə tə nə. Yá v wá ta ba v dé, v nə yi yun tiàn tə me *Yuu-Tiu, də pègá tə me Piú, tə yırı. Yá v mù də lià tə, v nə kúrí v li v tún, ba nə sè v nii də pùé nədv, wá dé diàn pègá tə yuu wa də wá.»

¹⁵ Malika tə kùbè pií, ka swìn à con, ka wú: «Níá tə, n nə nı də kacwarv tə jèé tə yuu wa, luv nii mama lià, də púló tə mama, də luv dwíá tə mama, də suyirə mama lià nə tə biri. ¹⁶ Yá nyuran fugə tə, n nə nı də wojijiru tə wá ti duŋi də kacwarv tə. Tə wá jon ku tə mama, kacwarv tə nə jə, tə ga wá yá wá yaswələ. Tə wá dé v yura nəŋú tə, tə ga dili ku giganı mən wa. ¹⁷ Yu ken tə pubuŋa wa, sə tə tun, tə twá ku tə nə, v nə dí yáá v tanı v tún, sə tə tun də pubuŋa nədv. Yá tə dāñ wá pa tə pàrì tə wojijiru tə nə, ku ja vəli máná tə, Yu sùràn tə mama nii nə wá bà, tə sú. ¹⁸ Kan təntə, n nə nı tə, nə biri tifarv tə, ku nə dé diàn, tia pègá tə me yuu wa.»

Babylonə tərɪ tə yoo

¹ Ku kwa nə, à nɪ *malɪka don, ka nan Yu *sàń nə, ka cú. Ka malɪka təntə yɪ diàn nəfaru tíú. Yá tia tə dǎń pɪru də ka dun tə. ² Ka zìn ka kori ka kə yu nə, ka wú:

«Ku tua, *Babylonə tiv nəfaru tə tua buuu. Ku jigə *zinə diè, ku jigə bwálí, zinə yiri mama, də zəŋə kukwɪnan yiri mama, ba nə culi, zwɪ tə sègè ku wa. ³ Babylonə tɪfaru tə tua, ku tiv təntə tián pɪn, dwíé tə luv mama wa twá ba nə, tə zu bacwan wa, ndə ba nyuan swana ba bubunɪ. Yá ba pɪn, tia yuu pègá tə twá, ba zu bacwan wa. Ba tə pɪn, tia yuu baywələ tə də twá ba jɪjə nəfaru tə nə, ba jì jɪjə tián.»

⁴ À nì kori don, ku nə nan Yu sàń, ku bà, ku wú:

«Á naŋa, á yá ku tiv təntə, á mù lià tə, á nə yɪ à mù lià. Á naŋa lá, sə á dǎnà ká twá á tun ba cuna təntə. Á naŋa lá, sə á dǎnà ká twá á dó ba yacara tə. ⁵ Cígá, cuna tə, ba nə fwa, tə dáá zənzən duən yuu, tə di tə jə yu nə. Yu wà Babylonə tián kunkun yìèn tə swèé. ⁶ Á fwa ku tə, tiv təntə tián nə fwa á yɪra, á ma ŋwín ba. Á ŋwíán ba cuna tə, ba nə tun á yɪra nəe bələ, á pa ba. Ba jə swana wùrú zwun, ba nə ma pɪn aba swana á nywìn. Á lwíá swana tə nə dáá, tə doni ba swana tə nəe bələ, á kə ba wùrú zwun təntə wa, á pa ba də nə, sə ba nyu.

⁷ Nətu tə, ba nə burɪ ba dun, ba ga tuŋa jɪjə yìèn, mə nətu nə, á mə, sə á kə ba càn də pucunɪ wa. Á mə, sə á fwa ba nətu.

Ba swìn ba waa con nə, ba wú: “Nə yɪ ndə pakan nə, ɸ nə tà kadənu, ɸ ga wàri pucunɪ ɸ nɪ abada.” ⁸ Ku mù təntə yɪrɪ nə,

ku yacara tə mama wá bà naa nədu. Tə càn təntə nə yɪ tian, pucunɪ, niən də mən, tə nə wá dó ku tiv tə. Ku wá fwa nətu,

*Yuu-Tiu Yu tə, ɸ nə bùrì ku bura, sə ɸ cùgù ku, nə yɪ diàn

tíú tə yırı.»

⁹ Tia yuu pègá tə mama, ba nə fwa bacwan, də ku mù tiv təntə tián, ba nə nı tori ba jıjə wiən tə wa, wá kwi yinia, ba ga ya pucunı wa tiv tə tırı tə yırı. Ba wá fwa ku nətu tə, mánjá tə wa, ba nə wá na mən, tə nə dé tiv tə, nywín də tə zaŋa, tə dı yu. ¹⁰ Ba wá zıgı kwa kwa, tə cən tə fən nə jə ba yırı. Ba wá swın, ba wú:

«Lɛɛ yí, lɛɛ yí Babılɔnə tıfaru tə! N yı tiv tə, ku nə jə diən, yá n bura twi,
ka bürı naa nədu.»

¹¹ Yá tia yuu baywələ tə də wá kwi yinia, yá ba ga ya pucunı wa, ku mù tiv tə yırı, liù nə kúbè təlól, u yə ba yolu zıla tə yırı. ¹² Tə zıla təntə yı: síán, də cınıa, də kapana wonanan zıla, tə yoo nə cà, də zanan, də gankıkalı yiri mama tə duən, də ga yı nəsiən mwin də wiən tə, ba nə fwa də dǝǝ, tə nə ziən. Də tə tə, ba nə fwa də tún yelə, də tə tə, ba nə fwa də tıú dǝǝ tə, ku yoo nə cà, də wiən tə, ba nə fwa də cınıa, də tə tə, ba nə fwa də lugu, də kacuncınpwıən, wiən ba nə mà. ¹³ Ku súrı wiən tə, nə yı turalı yirə yirə nə, də wiən duən, ba nə sǝrí, tə lwán nə ywán, də swana, də nuga, də dipen mun, də pamına, də nıan, də pee, də səsen, də tərəkörən, də ywəŋə.

¹⁴ Baywələ təntə dən wá swın, ba wú:

«N puswən wiən tə vəli yinunı, tə ga yá mú. Tə wiən tə mama, tə yoo nə cà, nə à yəǝ, tə nə ziən yii wa, n kwın tə nə. Yá tə kúbè təlól.»

¹⁵ Baywələ tə də nə yoli ku tiv tə wa, ba jı jıjə tián tə, wá zıgı kwa kwa, tə cən tə fən nə jə ba, sə tə dən ká yı ba, tə kə lá yırı. Ba wá kwi yinia, ba ga wá yə pucunı wa. Yá ba dən wá swın, ba wú:

¹⁶ «Lɛɛ yí, lɛɛ yí tıfaru tə. Tıfaru təntə yə yı ndə kan nə u zua gankıkalı, tə duən də ga yı nəsiən mwin. U yə kwən u tiən də síán, də kapana wonanan tə yoo nə cà, də zanan. ¹⁷ Yá u jıjə wiən tə mama dən nyua lá, naa nədu cıci wa.»

Llà tə mama, ba nə vırı nıá yuu bwərə tə, də ba yun tián, də llà tə nə

wulə tə wa, də lià tə mama nə tɔŋa muv tə yuu wa, dān yà ziga yinɔni.

¹⁸ Ba ywān, ba na tiw tə, nə dā mən tə nywīn, də tə zaŋa, tə dī yu nə. Yá ba dān wá bubwi ba swin, ba wú: «Tiw yà təlɔ́, ku nə wáá ku maŋa də tɪfaru ku tə.» ¹⁹ Ba lià tə dān pè purən, ba lwá ba yun wa, ba kwi, ba bubwi, ba ga kə ba tiàn pucɔni wa. Ba dān bubwi, ba wú:

«Lɛɛ yí, lɛɛ yí tɪfaru ku tə. Ku yi ku twá ku mù tɪfaru tə nə, ba tə mama nə jə níá yuu bwərə muv tə yuu wa, ma jì jɪjə tiàn. Yá ku zəzən ku cùgù, ku jì tutu, naa nədu cici wa.»

²⁰ Yu sàñ lià-ba, á yana pupwən wa, ku tiw tə tɔri tə yiri. Á mù lià tə, á nə yi Kərisə nə ti, də á mù Zwezi *tɔntuna-ba, də á mù Yu nii *sùsùnà-ba, á də yana pupwən wa. Yu nə bùrì tiw bura, ɔ ma pa aba cígá yiri.

²¹ Ku kwa nə, malika don, ka nə jə diàn, tì kapan, ku nə yi ndə kapan nəfaru nə, ba ma gà mun. Ka duli ku muv tə wa, ka ga wú:

«Mə nətu nə, ba wá yigu Babilɔnə tiw nəfaru tə, ba dī tia də diàn. Yá ku kùb bá pìi ku na. ²² Ba kùb bá nì kɔndurə tə konkolu kori, də gwàgá tə gwaran kori Babilɔnə wa. Ba ma kùb bá nì wii tə də nabwanan tə kori ku wa. Ba kùb bá na jun tutɔŋi liù mama, ɔ nə fwa tutɔnyiri mama ku wa. Ba kùb bá nì mun gàrán kori ku wa. ²³ Cànú mən poni kùb bá ya ku tiw tə wa. Ba kùb bá nì fúru zəzugu ku wa. Ku wá yà nətu, ku baywələ tə yà nə dwə tia yuu baywələ tə mama yiri. Ku mù tiw tɔntə tiàn ga nə tun ba cɪri tə, ba ma gɪgarɪ dwíé tə luv mama wa, ba dugu. ²⁴ Yá ku mù tiw tɔntə waa nə, ba nɪ Yu nii sùsùnà tə jana, də lià tə, ba nə yi Yu nyiən jana, də lià tə mama, ba nə ken sùu ba bian nə tia yuu wa, jana.»

Nətu lià nə bwɪ Yu nə Yu sàń tə wa

(Apokalisə 18.20-24, 11.15-17, 21.1-5)

¹ Ku kwa nə, à nì kori, ku nə jə diàn, ku nə yɪ ndə lakapupu nə swìn Yu
*sàń nə, ku wú:

«Aluluya! Nə nyina Yu nə jon nəba nə cuna wa. U mù nə tɪ dun, v ga jə
diàn də. ² U bura tə yɪ cígá bura, ku mɛ, sə ku ya nətu. U
bùrì kacwaran yáá tíú tə bura, v yà nə cùgà tia yuu lià tə də,
v nə pun ba pèní duən vɛɛ vɛɛ tə. Yá v dǎń fwìn v lɪɲa ku
kan tə yuu wa, v ga cùgù wá v tùtùná tə yɪɪ, v ga bwe v
tùtùná tə jana tə bwíə v con.»

³ Ba lià tǎntə nə wulə Yu sàń nə tə, kùb pǐi ba swìn nəɛ bələ nii nə, ba wú:

«Aluluya! Tɪu tə nə dé mən tə, nywǐń yɪ tə zaɲa, mǎɲá də mǎɲá, ku nə
ba zwè.»

⁴ *Nəkwina sapua də bania tə, də wiən bania tə dǎń tua Yu yáá con, ba
pa wá dun, v nə jǝə padau tə yuu wa, ba swìn, ba wú:

«Aluluya, ku yɪ cígá!»

⁵ Kori don nan padau tə yuu, ku wú:

«Á bwia nə nyina Yu tə nə, á mù lià tə mɛ, á nə yɪ v tutunbia, á nə zǐlí
wá! Á ləzwənbii də ləzwənfaran pian dun Yu nə!»

⁶ Yá à nì kori, ndə lakapupu kori nə, ku ga yɪ ndə níá nə dáá, tə ga dəri tə
biàn, ku ga yɪ ndə dwà nə baa də diàn nə də ku swìn, ku wú:

«Aluluya! Nə *Yuu-Tiu Yu tə, v nə wulə tə mɛ yuu wa, tún v pǎrì tə. ⁷ Nə
pwələ nə pùé, nə yana pupwən wa, sə nə ga pa dun *pabíə
tə, ka fúrí tə mǎɲá nə yí yɪɪ. Ka fúrí kan tə tanɪ v tiàn, v
dǎnì ka. ⁸ Yá ba dǎń pun, v zu gankíkala ku nə yɪ parɪ, ku ga
pɪpɪlɪ. Ku ganzəɲu tə burɪ lià tə, ba nə yɪ *Kərisə nə tɪ,
tutunan tə, tə nə yɪ cígá cígá yìèn.»

⁹ *Malika tə swìn à con nə, ka wú: «Púpúní yìèn tə tə: Pupwən wulə də ba tə, ba nə bon ba, ndə pabiə nə tə, fúrí tə wa!» Ka tə ma kúù swìn à con, ka wú: «Tə yí cígá sùràn, tə nə naŋa Yu con.» ¹⁰ À dàń ma tu ka nɛɛ nə, sə à pa ka dun. Yá ka dàń swìn à con nə, ka wú: «Cí n tìàn nə, dàn ká fwa ku yoo təntə! À də yí Yu tutunbia, ndə n nə, à ga yí ba tə, ba nə yí n nubia Kərisə yiri, ba nə swìn v sugv tə ba biri là nə, tutundon. N mɛ, sə n pa dun Yu nə mùú!» Ku yí Zwezi-Kərisə suywájú tə nə pín, Yu nii sùsùnà tə swìn v nii sùràn tə.

Lìù tə, v nə òìgà sisanpon tə yoo

(Zwidə 15, 2 Tesalonikə tìán 2.8)

¹¹ Ku kwa nə, à ywàń, də nèn, Yu *sàń tə ku sùrí, sisanpon ga ziga lá nə. Ba bonə lìù tə, v nə jèə ka yuu, pùə nədu tíú də cígá tíú. U mù nə bùrì bura də cígá, v ga yí cígá, v ma tɛ də. ¹² U yíá yí ndə mənvoò nə, dun yupurən, tə nə dáá, yà púə v yuu nə. U jə yiri don, ku nə púpúní v yira, lìù don nə yəri, də ku nə tà v tətə. ¹³ Yá v yà zua gandarv, ku nə swe də jana. U yiri nə yí “Yu Sugv.” ¹⁴ Kwatara tə nə wulə Yu sàń nə púə v kwa səsənpwənə yuu wa. Ba zua gankíkalan nəpwənə, tə nə yí parí. ¹⁵ Kwatara sùú, ku nə jə nii fùla fùla, naŋa lìù tə, v nə jèə sisanpon tə yuu, nii wa. Ku mù nə wá ta luv dwíə tə mama wa. U wá dé pàrì ba yuu wa də diàn. U wá pa Yu tə, v nə wulə tə mɛ yuu wa, luŋa zàn ba yuu wa, ndə ba nə titagí kacan zɔɔ nəfarv wa, sə ba lí tə níá nətv. ¹⁶ Yiri púpúní v gandarv tə də v ciin yira, ku wú, v yí: «Pègá mɛ Pìú, yun tìán mɛ *Yuu-Tiu.»

¹⁷ À ní malika don də ka ziga yícau tə wa. Ka zín ka kori, ka kə yu nə, ka swìn zuní tə mama con, tə nə pəri yu nə ban ban, ka wú: «Á biàn yəbə, á kun duən nə, á dé Yu cànà nəfarv tə! ¹⁸ Á biàn, á dé pègá nàŋú, də pamana yun tìán nàŋú, də ladúra nàŋú, də səsən, də là tə nə òìgà tə nàŋú! Á biàn á dé ba tə nə tí ba tìàn, də ba tə nə yí ywəŋə nàŋú, də ləzwənbii nàŋú, də

læzwənfaran nəŋú!»

¹⁹ Yá à dàń nɪ wojijiru tə, də tia yuu pègá, də ba kwatara, ba twi ba kun duən nə, sə ba mù də liù tə, ʋ nə dīgà sisan tə, də ʋ də kwatara tə, ta kùè də duən. ²⁰ Ba dàń ma ja wojijiru tə də kunkun sùsùnè. Liù tǝntǝ fwa diàn muminu wojijiru tə yáá con. ʋ gɪgarɪ lià tə, nə pɪn ba fwa wojijiru tə muminu tə ba yira, ba ga twi ku nyinyiga tə yáá con, ba pɪn ku dun. Ba dɪlɪ tə mama bələ mənvoɔ nəfaru wa də tə nəŋə. Bwálí tǝntǝ wa, mən tə yɪ tə dé də tə wa jirəbuu. ²¹ Ba kwatara tə gɪgarɪ tə mù yɪ liù tə, ʋ nə dīgà sisan tə, kwatara sùú tə nə naŋa ʋ nii wa tə, nə gua ba. Zuŋi tə mama dàń ma zuzugv ba nəŋú, tə sú.

20

Bina mǝrǝ pǝrɪ tə yoo

(Apokalisə 5.9-10)

¹ Ku kwa nə, à nɪ *malika, də ka nan Yu sǝń ka cú. Ka jǝ buu tə, ku dǝń nə lù zǝnzǝn, borbiu də banzala nəfaru ka jun wa. ²⁻³ Malika tə jun tɪdǝn tə, ku nə yɪ dǝn nədwan tə, ku nə yɪ “*zinə pìú” kukwɪɔn, ka mù ga nə yɪ “*Sɪtana”, ka vwa. Ka dàń dɪlɪ ku Sɪtana malikǝ buu tə wa, ku dǝń nə lù zǝnzǝn tə, sə ku fwa bina mǝrǝ. Ka tagv buu tə nii də borbiu, ka ga mà tanpɔn lá nə. Ku nətv dàń wá pa, ku kùè bá pǐí, ku gɪgarɪ dwíé tə luu mama wa, ku ja vələ bina mǝrǝ (1 000) tə, ka zwè. Ku kwa nə, ku mɛ, sə ba kùrɪ ku, ba dugv mǝŋǝ mǝncɪn wa nə.

⁴ À nɪ padaran, lià nə jǝé tə yuu wa. Lià tǝntǝ yà nɪ cwǝŋə, sə ba bùrɪ lià bura. À nɪ lià, ba nə tɪga, jǝrí. Ba lià tǝntǝ yɪ ba za ba gu, ba nə swɪn Zwezi-*Kərisə suywǝŋú tə, ku nə yɪ Yu sugv tə, ba bɪrɪ, tə yɪrɪ. Lià tǝntǝ vɪga, sə ba tv wojijiru tə də ku nyinyiga tə yáá con, ba pa tə dun. Ba lià tǝntǝ vɪga, sə ba kǝ wojijiru muminan tə ba tǝlé də ba jun nə. Yá ba lià

təntə dān nə pīl ba bwin ba wulə mu wa, ba ga wulə, ba dé pàrì də
Zwezi-Kərisə, ku ja vələ bina mūrù. ⁵ Mə təntən tɪga ka bwin ka nan tə nə.
Tɪga tə duən tə mù bá pīl ba bwin, ku ja vələ bina mūrù tə ka zwè. ⁶ Lìà tə,
ba nə twá ba wulə təntən tɪga tə ka bwin ka nan tə wa, yɪ pupwən lìà, ba
ga yɪ *Kərisə nə tɪ ba. Bələ nii tian tə ba diàn jə ba mù yuu wa. Yá ba dān
ya Yu də Kərisə *jonwana, ba ga wá yà də wá, ba dé pàrì, ku ja vələ bina
mūrù tə ka zwè.

Sitana turɪ tə yoo

⁷ Máná tə, bina mūrù tə nə wá zwè, ba wá kùrì *Sitana, ba lɪ u buu tə wa,
ku yà nə yɪ u bān diè. ⁸ Yá u dān wá nan u va, sə u gɪgarɪ dwíé tə luv
mama wa, ba nə wulə tia tə sapara bania tə wa. Luv níé təntə yɪra nə yɪ
Gɔgə də Magɔgə*fɪ*. U ken duən yáá nə, sə ba ta kùù. Ba nii wá yà dání,
ndə muu nii kasɪu nə. ⁹ Ba dān nan bwálá mama ba bà, ba kun duən nə
bwálá nədu. Yá ba dān vɛli ba kɪkarɪ lìà tə, Kərisə nə tɪ ba, bwálí tə wa, ba
nə wulə tiv tə, Yu nə swə zənzən tə wa. Yá mən dān nan yu nə tə cú, tə dé
ba mù lìà təntə, Sitana nə ken duən yáá nə, tə gu. ¹⁰ Ba dɪli Sitana, u nə
gɪgarɪ ba tə, mənvoov nəfaru də tə wa jirəbuu wa. Mə bwálí təntə wa nə ba
dɪli wojijiru tə də kunkun sùsùnù. Ba mama dān wá dé càn yɪcav də tutɪn
máná də máná, ku nə ba zwè.

Talukwa bura ka b̀̀r̀̀r̀̀ yoo

(2 Piyerə 3.7-12, Zwan 5.26-29, T̀̀t̀̀t̀̀nán 17.30-31)

¹¹ Ku kwa nə, à nɪ padav nəpon nəfaru də liù, u nə jèé ku yuu. Tia tə də
lanworu tə dərɪ tə jén u yáá con. Tə yà kùù t̀̀l̀̀l̀̀. ¹² Yá à dān nɪ tɪga tə
mama, ləzwənbii də ləzwənfaran, ba zɪga padav tə yáá con. Ba sùrú saga,
ba ga sùrí sagɪ don də, ku sagɪ tə nə yɪ mu sagɪ. Ba twá ku tə nə púpúní
saga tə wa nə, ba ma b̀̀r̀̀r̀̀ tɪga tə bura, ndə ba tutunɛɛ tə nə burɪ nətu.

¹³ Muu pun tɪga, ba nə mé ku wa, tian də tɪga bwálí də pun tɪga, tə nə wulə

tə con. Ba dān twá ba tɪga tə tūtùnán nə, ba ma buri nə ba liú mama bura.

¹⁴ Ba dili tian də tɪga bwálí nə mənvoov nəfaru wa. Mə ku mù yɪ nɛɛ bələ nii tian tə. ¹⁵ Ba dili liú mama, v yiri nə wà púpúní mu sagi tə wa, mənvoov nəfaru tɛntə wa.

21

Lanworu nədun də tia nədun tə yoo

(2 Piyeɾə 3.13-14, Romə tián 8.17-18)

¹ Təntən lanworu tə də təntən tia tə nyua lá. Muu də yà kúù təlú. Yá à dān nɪ lanworu nədun də tia nədun. ² Ku kwa nə, à nɪ tuw tə, ku nə Yu nyiən, ku nə yɪ *Zwerizalemə nədun tə, də ku nan yu nə Yu *sàń nə, ku cwi. Yu yà kwen ku ndə fúru kan nə kwen v tián nətu, sə v ma jəri v barɪ. ³ À nɪ kori, ku nə jə dián, də ku baa, ku nan padau tə con, ku wú: «Nèń, Yu dān wulə ləzoni tətəŋi wa. U wá yà də ba, ba ga wá yà v mù lià, ba nə nan dwíé tə mama wa. Yu tətə dān wá yà də ba, v ga wá yà ba Yu. ⁴ Yá v wá mùrí ba yinia mama. Tian, də pucvni, də bubwiə, də càn kúù bá ya lá, təntən wodura tə mama nə nyua lá yiri.»

⁵ Liú tə, v nə jəə padau tə yuu, ma swin, v wú: «Nèń, wiən tə mama yɪ wodura nə à pii à fwa.» U tə ma swin, v súrí lá nə, v wú: «Púpúní sùràn tə tə n tún. Tə yɪ cígá sùràn, tə ga mɛ, sə lià twá tə nə.» ⁶ U swin à con, v wú: «Ku fwa ku zwè. Á yɪ Aləfa də Omega, ku mù nə yɪ à yɪ təntən liú, à ga yɪ yígúré liú də. Liú tə nanyunɪ nə jə, à wá pa wá nabuliyia tə ku níá nə pun mu, sə v nyun tutu. ⁷ Liú tə nə wá ta v dé dián lwanɪ yuu wa. À wá yà v Yu, v ga wá yà à biú. ⁸ Yá lià tə, ba nə ba cwəŋə nədu ti, də lià tə, ba nə dugv Yu cwəŋə tə, də lià tə, ba nə tuŋa caviyien, də lagura, də lià tə nə cwàri, də lià tə nə fwa cɪrɪ yièn, də lià tə nə bwɪ wəŋwanan nə, də kunkena tə mama, ba mù lià tɛntə bwálí yɪ ku wulə mənvoov nəfaru də ku

wa jirəbuu tə wa nə. Mənvoo nəfaru təntə nə yɪ nɛɛ bələ nii tian tə.»

Zwerizalemə nəduŋ tə yoo

(Ebərə-ba 11.10, 16)

⁹ Ku kwa nə, *malika don twi à con. Malika təntə nan malikɛ barpɛ tə nə jə wùrú zwun barpɛ tə, tə nə súé də talikwa yacara barpɛ tə wa. Ka swìn à con, ka wú: «Bàá yəbə! À wá burɪ mú fúru kan tə, liù tə, v nə yɪ ndə *pabiə nə, nə kúrí v swe.»

¹⁰ Yu-*Siŋu tə cúé à yuu wa. Malika tə kúbè tì nə, ka ja dì paan nəfaru, ku yuu nə dara də tia.

Malika tə dàń ma burɪ nə tiw tə, ku nə yɪ Yu nyiən. Ku mù nə yɪ tiw tə, ku nə yɪ *Zwerizalemə tə, ku nə nan yu nə Yu *sàń nə, ku cwi. ¹¹ Yu dun tə yà pìrì ku. Tiw tə yà pɪpɪlɪ ndə kapana, ba nə ma nàŋà, ku də nə pɪpɪlɪ, ndə zəŋə nə, ku yoo nə cà, ba nə ma boŋə “zwasəpə.” ¹² Béré nəfaru, ku yuu nə dara də tia, yà kɪkari tiw tə. Ku yà jə mimien fugə bələ. Malikɛ fugə bələ yà cì mimien tə nə. Yira yà púpúní tə mimien tə yuu, tə nə yɪ *Yizərayelə lià dwíé dəkurən fugə bələ tə yira. ¹³ Yu yiptan con mimien batwa, jɪgwia saparu tə con mimien batwa, jɪzən saparu tə con mimien batwa, Yu yizwia con mimien batwa. ¹⁴ Béré tə yà yɪ ka zɪga pìràn fugə bələ yuu wa. Tə pìràn təntə lwiu tə nədu mama yuu wa nə, ba púpúní pabiə tə tuntuna fugə bələ tə yira lá nə.

¹⁵ Malika tə nə swìn à con yà jə síán mu, ku nə maŋa wiən, sə v ma man tiw tə, də ku mimien, də ku bérí. ¹⁶ Malika tə man tiw tə dàní də ku wani ku na də tə mama mɛ duən. Ku man tiw tə dàní də dɔ̀̀ tə, ku yà dwə kilometərə mùrù bələ (2 000). Tiw tə wani də ku yuu tia ziga yà mɛ də ku dàní tə. ¹⁷ Malika tə man béré tə, ku nɪ də ku yɪ metərə 72. Malika tə yɪ ləzoni nə maŋa wiən nətu nə ku man.

¹⁸ Béré tə yɪ kapan tə, ba nə ma boŋə “zwasəpə”, tə nə ba ma lwà ku. Tiw

tə mama yɪ sían parɪ, nə ba ma fwa kʊ, kʊ ga yɪ ndə zəŋə nə, kʊ nə pɪpɪlɪ.

¹⁹⁻²⁰ Tɪw tə dəkuu pìù kapana tə yɪ ba nàɴ tə də kapana yirə yirə, tə mama yoo nə cà. Tɪw tə dəkurən fugə bələ tə nədu mama yà jə kapan yiri don.

Kapana təntə yira nə yɪ: zwasəpə, safirə, kaləsɪduvanə, emerodə, sarədonikəsə, sarəduvanə, kərisolitə, berilə, topazə, kərizopərazə, dirəkvazə, ametisətə. ²¹ Mimiə fugə bələ tə yɪ kapana fugə bələ tə yoo nə cà. Mimi mama yɪ kʊ fwa də zàŋú nədu. Tɪw tə kanporu yà yɪ, kʊ fwa də sían tə nə yɪ parɪ, kʊ nə yɪ ndə zəŋə nə, kʊ nə pɪpɪlɪ.

²² À wà Yu *diè nɪ tɪw tə wa. *Yuu-Tiu Yu tə, ʋ nə wulə tə mɛ yuu wa, də pabiə nə tə, nə wulə kʊ wa, yá lià tə ga pɪn ba dun. ²³ Tɪw tə ba yɪcau də cànà pià, sə tə pa kʊ poni. Yu dun tə də yɪ liù tə, ʋ nə yɪ ndə pabiə nə tə, nə pìrɪ kʊ mama də poni. ²⁴ Dwíé tə luv mama wa wá yà kʊ poni tə wa. Tia yuu pègá tə də wá ja ba jɪjə tə, ba bà kʊ wa. ²⁵ Kʊ mimien tə bá sun yɪcau wa, abada. Tɪtɪn bá yà lá, kʊ mù nə pɪn, tə bá sun. ²⁶ Kʊ bwálí tə wa nə, ba wá ja dwíé tə luv mama wa jɪjə, də ba dun ba nə pɪn, ba ja bà. ²⁷ Won tə, kʊ nə jə durən bá zʊ lá. Liù tə nə tɪŋa cavɪyɪən də liù tə nə kʊnɪ kʊnkʊn də bá zʊ lá. Kʊ yɪ lià tə cɪcɪ, ba yira nə púpúní pabiə tə mu sagɪ tə wa, nə wá zʊ lá nə.

22

¹ Kʊ kwa nə, malɪka tə bɪrɪ nə mʊnaa tə, kʊ níá nə pɪn mu. Kʊ níá tə yɪ napwənə pírɪ pírɪ pírɪ, ndə zəŋə nə pɪpɪlɪ nətu. Mʊnaa tə níá yɪ, tə dəri tə naŋa Yu də pabiə tə padav tə con. ² Tɪw tə kanporu tətəŋi wa də mʊnaa tə bəbərən bələ tə yuu wa nə, tìú tə, kʊ yàá nə pɪn mu yà wulə lá. Kʊ tɪw tə zɪŋa bia nəɛ fugə bələ bɪnɪ wa. Cànà mama, kʊ yàá zɪn bia. Tìú tə vuran tə yɪ ba ma ywarɪ dwíé tə luv mama wa, tə ga nə pɪn ba yazurə. ³ Won mama kùb bá ya lá, Yu nə wá cègù. Yu də pabiə nə, padav tə wá yà tɪw tə wa. Yu tutunbia tə nə wá pa wá dun. ⁴ Ba wá na ʋ yáá, ʋ ga wá púpúní ʋ yɪrɪ ba

télé nɛ. ⁵ Titun kùbù bá ya lá, yá ba kùbù bá pià cànú mən, nɛ à yèé yɛcav poni, Yuu-Tiu Yu nɛ wá pa poni pìrì ba yiri. Yá ba dàn ga wá twá ba dɔ pàrì dɔ Yu, ku nɛ ba zwè máná dɔ máná.

Zwezi túrí tɛ yoo

(Apokalisə 1.1-3, 7-8, Matie 16.27, Galasi tiàn 6.7-8)

⁶ *Malika tɛ swìn à con nɛ, ka wú: «Sùràn tɛ, tɛ yi cígá sùràn, tɛ ga mɛ, sɛ lià twá tɛ nɛ. *Yuu-Tiu tɛ, v pin v *Singu tɛ v nii *sùsùnà tɛ nɛ. U mù ga nɛ tun v malika, sɛ ka biri v tutunbia tɛ yìèn tɛ, nɛ mɛ, sɛ ku bà síún síún.»

⁷ Zwezi swìn, v wú: Á cuga zəni, à biàn síún síún. Pupwən liù nɛ yi liù tɛ, v nɛ jə sagi ku tɛ sùràn tɛ, tɛ nɛ yi Yu nii sùràn, v waa con.

⁸ Ku yi à mù Zwan nɛ nì, à ga na tɛ wiən tɛntɛ. Máná tɛ, à nɛ nì, à ga na tɛ wiən tɛntɛ, malika tɛ nɛ biri nɛ à zwè, à tua tia ka nɛ nɛ, sɛ à pa ka dun. ⁹ Yá ka dàn swìn à con nɛ, ku wú: «Ci n tiàn nɛ, dàn ká fwa ku yoo tɛntɛ! À dɔ yi Yu tutunbiu ndə n nɛ, à ga yi ba tɛ, ba nɛ yi n nubia *Kərisə yiri, ba nɛ yi Yu nii sùsùnà tɛ wa liù. À yi ba tɛ nɛ jə sagi ku tɛ wa sùràn tɛ ba waa con tɛ liù don. Pa dun Yu cici nɛ!»

¹⁰ Malika tɛ kùbù swìn à con, ka sùrí lá nɛ, ka wú: «Dàn ká sègè sagi ku tɛ sùràn, tɛ nɛ yi Yu nii sùràn tɛ, máná tɛ nɛ bwélé yiri, swìn tɛ n biri. ¹¹ Liù tɛ, v nɛ tɛlé cígá wa, mɛ, sɛ v kwen v nan cígá wa, v sùrí lá. Liù tɛ, v nɛ beri v tiàn cuna wa, mɛ, sɛ v kwen v beri v tiàn, v sùrí lá. Liù tɛ dɔ v nɛ wulə cígá wa, mɛ, sɛ v kwen, v ya cígá wa, v doni. Liù tɛ, v nɛ yi Yu nyiən, mɛ, sɛ v kwen, v tun Yu fira, v doni.» ¹² Zwezi swìn, v wú: «Á cuga zəni, à biàn síún síún. À ja liù mama tutunɛ ɲwírán, à biàn, sɛ à ma ɲwín wá. ¹³ À yi Aləfa dɔ Omega, ku mù nɛ yi tɛntən dɔ talikwa liù. À yi tɛntən liù, à ga yi yígúré liù dɔ.

¹⁴ Pupwən lià nɛ yi lià tɛ, ba nɛ sun ba ganzwiran, ku pa ba na cwəɲə, ba dɔ tiú tɛ bia, tɛ nɛ pin mu, ku tɛ pa ba na cwəɲə, ba twá Yu tuw tɛ mimien,

ba zu ku wa. ¹⁵ Yá là tà, ba nə tɔŋa cavɪyən tə, ndə kukuri nə, də ba tə nə fwa cɪɾɪ yìèn, də là tà, ba nə cwàɾì də duən vɛɛ vɛɛ, də lagura tə, də là tà nə bwɪ woŋwanan nə, də là tà mama nə swə kunkun, ba ga tɔŋa kunkun yìèn, ba là tàntə ba bwálí jə ku tiv tə wa. Ba là tàntə wá mé kàrá wa.»

¹⁶ Zwezi kùb swìn, v wú: «À mù Zwezi nə tun à maluka tə, sə ka swìn tə yìèn tàntə à là tà púló tə wa. À yɪ piú *Davidə dwíí tə wa bìú. À mù nə yɪ jɪv naŋun tə, ku nə pɛn ku pɪpɪlɪ tə.»

¹⁷ Yu-*Sɪŋu tə də fúrí kan tə dàń swìn, ba wú: «Bàá!» Lìù tə, v nə nèn tə sùràn tàntə mɛ, sə v swìn, v wú: «Bàá yəbə!» Lìù tə nanyonɪ nə jə, ku tíú mɛ, sə v bà v nyun níá. Lìù tə, v nə pià níá tə nə pɪn mu, ku tíú mɛ, sə v na tə tutv!

¹⁸ À mù Zwan nə swìn lìù tə mama con, v nə nèn Yu *nii sùràn tə, sagɪ ku tə wa, à wú: «Lìù tə, v nə sùrí yoo tə nə, Yu wá kə wá yacara wa, ndə sagɪ ku tə nə bɪɾɪ, càn yirə yirə tə nətv. ¹⁹ Yá lìù nə kùb lɪ Yu nii sùràn tə sagɪ ku tə wa, v dɔgv, Yu bá pa wá cwəŋə, sə v twá v dé tìú tə bia tə nə pɪn mu tə. Yá Yu bá pa wá cwəŋə, sə v twá v zu tiv tə wa, ku nə yɪ Yu nyiən, ndə ku nə púpúní Yu sagɪ tə wa.» ²⁰ Zwezi tə, v nə swìn tə yìèn tàntə v bɪɾɪ, nə swìn v sùrí lá, v wú:

«Cígá, à biàn síón síón.»

Amuna! Bàá Yuu-Tiu Zwezi!

²¹ Yuu-Tiu Zwezi nə wá fwa pubwanv á mama yira.